

摘藻堂四庫全書薈要

經部

欽定四庫全書薈要

經部

左傳注疏卷三

詳校官原任侍講臣王燕緒



欽定四庫全書薈要卷一千一百十九

經部

春秋左傳注疏卷三

起隱公六年  
盡十一年

晉杜氏注 唐陸德明音義 孔穎達疏

經六年春鄭人來渝平注和而不盟曰平音義

渝羊朱反變也

正義曰宣十五年宋人及楚人平傳載其盟辭昭  
七年燕暨齊平傳稱盟于濡上似平皆有盟而云不

盟者平實解怨和好之辭非要盟也彼自既平之後別  
為盟耳此與定十年及齊平皆傳無盟事定十一年及  
鄭平下乃云叔還如鄭治  
盟平後乃盟知平非盟也

夏五月辛酉公會齊侯盟于艾注泰山牟縣東南有艾

山音義

艾五  
蓋反

秋七月注雖無事而書首月具四時以成歲他皆放此

疏

注正義曰公羊傳曰此無事何以書春秋雖無事首時過則書首時過則何以書春秋編年四時具然後

爲年此注用公羊爲說釋例曰年之四時雖或無事必空書首月以紀時變以明歷數也

冬宋人取長葛注秋取冬乃告也上有伐鄭圍長葛長

葛鄭邑可知故不言鄭也前年冬圍不克而還今冬乘

長葛無備而取之言易也音義

易以豉  
反傳同

疏

注正義曰經書冬傳言秋

丘明爲傳例不虛舉經文獨以秋言此事明是以秋取冬乃告也冬告者告言冬始取耳故書之於冬若其使

以冬至告言秋取亦當追書於秋八年傳曰冬齊侯使來告成三國秋成冬告書之於秋明此以冬取告故書於冬也賈服以爲長葛不繫鄭者刺不能撫有其邑凡邑爲他國所取皆是不能撫有之何故於此獨爲惡鄭故杜以爲上有伐鄭圍長葛則長葛鄭邑可知故不言鄭也旣言秋取取實在秋因其經文在冬遂言冬乘無備襄十三年傳例曰凡書取言易也知此乘其無備而取之也杜知長葛不繫鄭非大都以名通者以前年云伐鄭圍長葛長葛之文繫於鄭故也

劉炫以大都名通而規杜氏非也

傳六年春鄭人來渝平更成也注渝變也公之爲公

子戰於狐壤爲鄭所執逃歸怨鄭鄭伐宋公欲救宋宋使者失辭公怒而止忿宋則欲厚鄭鄭因此而來

故經書渝平傳曰更成音義

壞如掌反使所吏反

疏

注正義曰渝變也釋

言文變平者變更前惡而復爲和好變即更之義成則平之訓故傳解渝平謂之更成自孤壞以來與鄭不和今曰復和故曰更成言更復孤壞以前之好也服虔云公爲鄭所獲釋而不結平於是更爲約束以結之故曰渝平案傳公賂尹氏而與之逃歸非鄭所釋安得釋而結平也

○翼九宗五正

頃父之子嘉父逆晉侯于隨注翼晉舊都也唐叔始

封受懷姓九宗職官五正遂世爲晉强家五正五官

之長九宗一姓爲九族也頃父之子嘉父晉大夫音

義

頃音傾長丁丈反下文及注同

疏

注正義曰唐叔始封受懷姓九宗職官五正者謂周成王滅唐

始封唐叔於懷氏一姓九族及是先代五官之長子  
孫賜之言五官之長者謂於殷時爲五行官長今褒  
寵唐叔故以其家族賜之耳今云頃父之子嘉父者  
以頃父舊居職位名號章顯嘉父新爲大夫未甚著  
見故繫之於父諸繫父  
爲文者義皆同此也

納諸鄂晉人謂之鄂侯注鄂

晉別邑諸地名疑者皆言有以示不審闕者不復記  
其闕他皆放此前年桓王立此侯之子於翼故不得

復入翼別居鄂音義

鄂五各反不復扶又反下同

疏

注正義曰杜言不復記其

闕者謂但言某邑而已下不云闕若鄂直云晉別邑  
及翼侯奔隨注云隨晉地鄭人侵衛牧注云牧衛邑  
如此之類皆不言闕是也若不知何國之地者則言  
闕若虞公出奔共也公孫嬰齊卒于狸脹並注云闕

是也亦有雖知某國之地注亦云闕則隱十一年蘇  
忿生十一邑注陞云闕者以餘邑皆知所在唯此獨  
也闕故○夏盟于艾始平于齊也注春秋前魯與齊不

平今乃棄惡結好故言始平于齊音義好呼報反○五月

庚申疏正義曰案經盟于艾亦在五月傳略不言月  
庚申之日須月以統之故別言五月他皆放

此鄭伯侵陳大獲往歲鄭伯請成于陳注成猶平也

陳侯不許五父諫曰親仁善鄰國之寶也君其許鄭

注五父陳公子佗音義佗徒何反  
人名皆同陳侯曰宋衛實難

注可畏難也音義難乃旦反鄭何能爲遂不許君子曰



善不可失惡不可長其陳桓公之謂乎長惡不悛從

自及也注悛止也從隨也音義

悛七全反

雖欲救之其將

能乎商書曰惡之易也如火之燎于原不可鄉邇注

商書盤庚言惡易長如火焚原野不可鄉近音義

燎力

召反又力弔反鄉本又作嚮同許亮反近附近之近

其猶可撲滅注言不可撲

滅音義

撲普卜反

周任有言曰注周任周大夫音義

任音士

爲國家者見惡如農夫之務去草焉芟夷蘊崇之絕其本根勿使能殖則善者信矣注芟刈也夷殺也蘊

積也崇聚也音義

去起呂反芟所銜反說文作發匹末反云以足蹋夷草蘊紆粉反信

如字一音申

○秋宋人取長葛○冬京師來告饑公爲之

請糴於宋衛齊鄭禮也注告饑不以王命故傳言京

師而不書於經也雖非王命而公共以稱命已國不

足旁請鄰國故曰禮也傳見隱之賢音義

爲于偽反糴直歷反

見賢疏

注正義曰王使至魯皆應書經此獨不書故遍反疏解之以人情恕之不得自不輸粟空告他人

故知已國不足旁請鄰國故曰禮也定五年歸粟于蔡尚書於經此不書者魯以往歲螟災故已國饑困所輸不多宋鄭輸粟不復告魯故皆不書此事無經而發故解傳意見隱之賢諸無經之傳皆意有所見

悉皆  
放此

○鄭伯如周始朝桓王也注桓王即位周鄭交

惡至是乃朝故曰始王不禮焉周桓公言於王曰我

周之東遷晉鄭焉依注周桓公周公黑肩也周采地

扶風雍縣東北有周城幽王爲犬戎所殺平王東徙

晉文侯鄭武公左右王室故曰晉鄭焉依音義

焉依  
如字

或於虔反非雍於用反左  
音佐右音祐又並如字

疏注正義曰桓公是周公  
黑肩事見桓十八年傳

也幽王娶申女爲后生太子宜臼後得褒姒嬖之生  
子伯服廢申后逐太子以褒姒爲后伯服爲太子宜  
臼奔申申侯乃與犬戎共攻幽王殺幽王於驪山之  
下於是諸侯乃與申侯共立宜臼是爲平王以西都

偏戎晉文侯鄭武公夾輔平王東遷洛邑毛詩尚書國語史記皆畧有其事善鄭以勸來

者猶懼不旣注旣至也音義

旣其器反

况不禮焉鄭不來

矣注爲桓五年諸侯從王伐鄭傳

經七年春王三月叔姬歸于紀注無傳叔姬伯姬之娣

也至是歸者待年於父母國不與嫡俱行故書音義

嫡本

又作適同丁歷反

疏

注正義曰女嫁於他國皆有姪娣叔姬待年行則所尊在適書適不書姪娣叔姬待年

之女人之娣尊與卿同其書固是常例賈云書之者刺紀

貴叔姬傳無其

事是妄說也

滕侯卒注傳例曰不書名未同盟也滕國在沛國公丘

縣東南音義

沛音

疏

正義曰譜云滕姬姓文王子錯叔

繡之後武王封之居滕今沛郡公

丘縣是也自叔繡至宣公十七世乃見春秋隱公以下春秋後六世而齊滅之世本云齊景公亡滕案齊景之卒在滕隱之前世本言隱公之後仍有六世為君而云齊景亡滕為謬何甚服虔昭四年注亦云齊景亡滕是不考校而謬言之地理志云沛郡公丘縣故滕國也周文王子錯叔繡所封三十一世為齊所滅

夏城中丘注城例在莊二十九年中丘在琅邪臨沂縣

東北音義

琅音郎沂魚依反

齊侯使其弟年來聘注諸聘皆使卿執玉帛以相存問

例在襄九年疏

注正義曰聘禮使者執圭以致命束帛加璧以致享鄭玄云享獻也既聘又獻

所以厚恩惠也是執玉帛以相存問也玉人職云琢圭璋璧琮八寸以覲聘注云八寸者據上公之臣案聘禮圭以聘君璋以聘夫人既行聘之後璧以享君琮以享夫人又鄭玄注小行人云使卿大夫覲聘降其君瑞一等則侯伯之臣圭璋璧琮皆六寸子男之臣皆四寸又小行人云圭以馬璋以皮璧以帛琮以錦琥以繡璜以黼鄭玄注云二王之後享天子圭以馬享后璋以皮其餘諸侯享天子璧以帛享后琮以錦子男享大國之君琥以繡享大國夫人璜以黼是玉帛之文也

## 秋公伐邾

冬天王使凡伯來聘注凡伯周卿士凡國伯爵也汲郡

共縣東南有凡城音義

共音恭凡字本作汎音凡

戎伐凡伯于楚丘

以歸注戎鳴鐘鼓以伐天子之使見夷狄彊隄不書凡

伯敗者單使無衆非戰陳也但言以歸非執也楚丘衛

地在濟陰城武縣西南音義

使所更反下同見賢遍疏反隄蒲報反陳直覲反

注正義曰傳例有鐘鼓曰伐此既言伐知其鳴鐘鼓也杜意言以歸者以彼隨已而已非囚執之辭故云但言

以歸非執也杜必知以歸非執者穀梁傳云以歸猶愈乎執也又昭十三年晉人執季孫意如以歸若以歸是

執何須別起執文明直言以歸者非執也至如定四年以沈子嘉歸經云殺之哀七年以邾子益來傳云囚諸

負瑕既有囚殺之文容或是執若直言以歸無囚殺之事者則非執者也春秋有文同事異此即其類也劉君

引沈子邾子云以歸者皆  
孰以規杜氏非其義也

傳七年春滕侯卒不書名未同盟也凡諸侯同盟於  
是稱名故薨則赴以名注盟以名告神故薨亦以名  
告同盟告終稱嗣也以繼好息民注告亡者之終稱  
嗣位之主嗣位之主當奉而不忘故曰繼好好同則  
和親故曰息民音義好呼報反注同謂之禮經注此言凡例  
乃周公所制禮經也十一年不告之例又曰不書於  
策明禮經皆當書於策仲尼脩春秋皆承策爲經丘



明之傳博采衆記故始開凡例特顯此二句他皆放

此疏

正義曰諸侯者公侯伯子男五等之總號侯訓君也五等之主雖爵命小異而俱是國君故總

稱諸侯也諸發凡者皆周公之垂法史書之舊章丘明采合舊語以發明史例雖意是舊典而辭出丘明非全寫舊語同盟稱名薨則赴以名是周公之舊典其告終稱嗣以下乃是解釋赴意非舊語也僖二十三年又發例曰凡諸侯同盟死則赴以名禮也直言赴名是禮不言繼好是禮繼好息民是禮之大意非禮之實明是丘明言此以解赴名之意彼云禮也此云謂之禮經其事一也言謂此赴名爲禮之常法丘明之意言周公謂之然也謂之禮經雖指此一事諸發凡者莫不盡然以此爲例之初故特言之注正義曰凡例是周公所制其來亦無所出以傳言謂之禮經則是先聖謂之非丘明自謂之也史之書策必有

舊法一代大典周公所制故知凡例亦是周公所制此言凡例則云謂之禮經下言凡例則云不書于策以此明所謂禮經皆當書策從傳之首至此始開凡例故特顯此二句二句者謂之禮經是一句與不書于策爲二句也然則九年凡雨自三日以往爲霖不以爲始而遠取十一年云始開凡例者以九年唯記當國雨雪之事史策舊文非是赴告國家大事之例○夏城中丘書不時也○

齊侯使夷仲年來聘結艾之盟也注艾盟在六年○

秋宋及鄭平七月庚申盟于宿公伐邾爲宋討也注

公距宋而更與鄭平欲以鄭爲援今鄭復與宋盟故

懼而伐邾欲以求宋故曰爲宋討音義

爲宋于偽反注爲宋同援

于春反復  
扶又反

○初戎朝于周發幣于公卿凡伯弗賓注

朝而發幣於公卿如今計獻詣公府卿寺疏

注正義曰朝於

天子獻國之所有亦發陳財幣於公卿之府寺如今者如晉時諸州年終遣會計之吏獻物於天子因令以物詣公府卿寺然自漢以來三公所居謂之府九卿所居謂之寺風俗通曰府聚也公卿牧守府道德之所聚也藏府私府財貨之所聚也寺司也庭有法度令官所止皆曰寺釋名曰寺嗣也治事者相嗣續

於其冬王使凡伯來聘還戎伐之于楚丘以歸注傳

言凡伯所以見伐○陳及鄭平注六年鄭侵陳大獲

今乃平十二月陳五父如鄭涖盟注涖臨也壬申及

鄭伯盟歃如忘注志不在於歃血也音義

歃色洽反歃血也如

忘亡亮反服虔云如而也

疏

正義曰歃謂口含血也當歃血之時如似遺忘物然故注云志不在於歃

血也服虔云如而也臨歃而忘其盟載之辭言不精也盟載之辭在於簡策祝史讀以告神非歃者自誦之何言忘載辭也且忘否在心五父終洩伯曰五父不自言已忘洩伯安知其忘而譏之

必不免不賴盟矣注洩伯鄭洩駕音義

洩息列反

鄭良佐

如陳涖盟注良佐鄭大夫辛巳及陳侯盟亦知陳之

將亂也注八其國觀其政治故總言之也皆爲桓五

年六年陳亂蔡人殺陳佗傳音義

治直吏反

○鄭公子忽

在王所故陳侯請妻之注以忽爲王寵故音義

妻七計反

鄭伯許之乃成昏注爲鄭忽失齊昏援以至出奔傳

音義

爲鄭于  
偽反

經八年春宋公衛侯遇于垂注垂衛地濟陰句陽縣東

北有垂亭音義

句古  
侯反

三月鄭伯使宛來歸祊注宛鄭大夫不書氏未賜族祊

鄭祀泰山之邑在琅邪費縣東南音義

宛於阮反祊必  
彭反費音秘

疏

注正義曰內卿貶則去族外卿貶則稱人外無去族  
之理今宛無族傳無譏文故知未賜族也傳言鄭釋

泰山之祀使來歸祊知祊是鄭祀泰山之邑鄭以桓公之故受邑泰山之下天子祭泰山必從往助祭使共湯沐焉故公羊謂之湯沐之邑既有此邑因立別廟劉炫云言祀泰山之邑者謂泰山之旁有此邑邑內有鄭宗廟之祀蓋祀桓武之神

庚寅我入祊注桓元年乃卒易祊田知此

入祊未肯受而有之

夏六月己亥蔡侯考父卒注無傳襄六年傳曰杞桓公

卒始赴以名同盟故也諸侯同盟稱名者非唯見在位

之君也嘗與其父同盟則亦以名赴其子亦所以繼好

也蔡未與隱盟蓋春秋前與惠公盟故赴以名音義見

賢

遍反好呼報反

**疏**

注正義曰同盟赴名自有成例而引杞桓公者蔡自春秋以來未與魯盟疑與惠公同盟

故引杞桓爲例杞桓與成公同盟而以名赴襄公傳曰同盟故也則與其父盟得以名赴其子故疑蔡與惠盟故以名赴隱也同盟稱名則兩君相知君既知之則國內皆知故彼父雖薨得以名赴彼子以此名當與彼父對稱故也若父與彼盟彼君雖在此子不得以其名赴以此名未與彼君對稱故也

**辛亥宿男卒**

注無傳元年宋魯大夫盟于宿宿與盟也

晉荀偃禱河稱齊晉君名然後自稱名知雖大夫出盟亦當先稱己君之名以答神明故薨皆從身盟之例當告以名也傳例曰赴以名則亦書之不然則否辟不敏

也今宿赴不以名故亦不書名諸例或發於始事或發於後者因宜有所異同亦或丘明所得記注本末不能皆備故音義

宿與音預下不與同  
禱丁老反或丁報反

疏

注正義曰於例盟以國地則地主與

之元年盟于宿知宿與盟也魯宋俱是微人宿君必不親與知宿亦大夫盟也盟禱雖異俱是告神荀偃之禱先稱君名知大夫聚盟亦各稱君名臣盟既稱君名則君費得以名赴宿君之卒宜以名赴魯今宿男不名自不以名赴非法不得也故引僖二十三年傳例以明之言其赴不以名雖知亦不得書也諸君不親盟而以名赴魯注云大夫盟於某者義皆出此衛冀隆難杜云周人以諱事神臣子何得以君之名告神又荀偃禱河一時之事耳非正禮也何得知大夫盟先稱君名乎杜必為此解者以諱事神謂諱神之名以事其神若祭祖而



諱祖之類山川之神尊於諸侯故尚書武成告名山大川云有道周王發則苟偃禱河自稱君名於理何怪杜云諸例或發於始事或發於後者若七年滕侯卒傳曰凡諸侯同盟於是稱名及桓二年公至自唐凡公行告于宗廟是或發於始事也宣四年凡弑君稱君及僖二十六年凡師能左右之曰以是或發於後也云因宜有所異同者宣四年鄭公子歸生弑君嫌歸生無罪及宣五年高固來逆叔姬嫌見偏成昏故傳因以明之是也云亦或立明所得記注本末不能皆備者但杜又自疑以為諸例皆應從始事而發在後發者以記注周公舊凡不繫於始事繫於後事丘明作傳因記注所繫遂以發之如杜此言則周公舊凡於記注之文散在諸事丘明作傳因記注之文發例故或先或後也

秋七月庚午宋公齊侯衛侯盟于瓦屋注齊侯尊宋使

主會故宋公序齊上瓦屋周地疏

注正義曰春秋之例國以大小為序外傳

鄭語云齊莊僖於是乎小伯此齊侯即僖公也此盟平宋衛也齊為會主則齊宜在上今宋在齊上故特解之由宋敬齊侯與衛先遇故齊侯尊宋使為會主瓦屋既闕知是周地者以其會于溫盟于瓦屋會盟不得相遠溫是周地知瓦屋亦周地也

八月葬蔡宣公注無傳三月而葬速

九月辛卯公及莒人盟于浮來注莒人微者不嫌敵公

侯故直稱公例在僖二十九年浮來紀邑東莞縣北有

邳鄉邳鄉西有公來山號曰邳來間音義

邳蒲悲反間如字

疏

注正義曰僖二十九年公會王子虎及諸侯之卿盟于翟泉沒公不言貶卿稱人直言會某人某人傳曰卿不書罪之也在禮卿不會諸侯會伯子男可也此莒人乃對會公侯故解之莒是小國卿當稱人非貶辭也微者不嫌能敵公侯故直稱公也

螟注無傳為災

冬十有二月無駭卒注公不與小斂故不書日卒而後

賜族故不書氏音義

斂力  
驗反

傳八年春齊侯將平宋衛注平宋衛於鄭有會期宋公以幣請於衛請先相見注宋敬齊命衛侯許之故

遇于犬丘注犬丘垂也地有兩名疏

注正義曰地有兩名新舊改易

者傳則言實以明之若二名俱存者傳則錯經以見之此犬丘與垂兩名俱存故傳不言實釋例曰若一地二名當時並有則直兩文互見黑壤犬丘時來之屬是也猶卿大夫名氏互見非例也○鄭伯

請釋泰山之祀而祀周公以泰山之祊易許田三月

鄭伯使宛來歸祊不祀泰山也注成王營王城有遷

都之志故賜周公許田以為魯國朝宿之邑後世因

而立周公別廟焉鄭桓公周宣王之母弟封鄭有助

祭泰山湯沐之邑在祊鄭以天子不能復巡守故欲

以祊易許田各從本國所近之宜恐魯以周公別廟為疑故云已廢泰山之祀而欲為魯祀周公孫辭以

有求也許田近許之田音義

泰山如字東岳能復扶又反守手又反近附近

之近下同又如字欲為于偽反下為魯同

疏

注正義曰成王營邑於洛邑為居土之中貢賦路均將於

洛邑受朝許田近於王城故賜周公許田以為魯國朝宿之邑詩魯頌曰居常與許復周公之宇是周公

得許田也公羊傳曰許田者何魯朝宿之邑也是許

田為魯朝宿之邑鄭請易許田而求祀周公故知後

世因在許田之中而立周公別廟焉鄭桓公以周宣

王之母弟故於泰山之下亦受祊田以為湯沐之邑

祊邑內亦有鄭先君別廟此時周室既衰王不巡守

鄭以天子不復巡守則泰山之祀既廢祊無所用故

欲以祊易許許田近鄭祊田近魯各從本國所近之  
宜也魯以許田奉周公之祀易其田則廢其祀恐魯  
以周公別廟為疑慮將不許云已廢泰山之祀而欲  
為魯祀周公言鄭得許田周公之祀不絕也云已廢  
泰山之祀者謂天子不復巡守鄭家已廢此助祭泰  
山祭祀之事無所祭祀故欲為魯祀周公其實廢來  
已久今始云已廢者欲為魯祀周公故云已廢耳方  
便遜辭以求於魯也定四年祝佗言康叔之受分物  
云取於有閭之土以共王職取於相土之東都以會  
王之東菟有閭之土猶魯之許田也相土之東都猶  
鄭之祊邑也鄭近京師無假朝宿魯近泰山不須湯  
沐各受其一衛以道路並遠故兩皆有之禮記王制  
曰方伯為朝天子皆有湯沐之邑於天子之縣內然  
則朝宿之邑亦名湯沐但向京師主為朝王從王巡  
守主為助祭祭必沐浴隨事立名朝宿湯沐亦互言  
之耳異義左氏說諸侯有大功德乃有朝宿湯沐之

邑公羊說以為諸侯皆有朝宿湯沐之邑許慎以公  
羊為非則杜意亦從許慎也公羊傳曰此魯朝宿之  
邑也則蜀為謂之許田諱取周田也諱取周田則蜀  
為謂之許田繫之許也蜀為繫之許近許也杜言近  
許之田是用公羊為說杜依公羊之傳邑實近許故  
以許為名劉君更無所馮直云別有許邑邑自名許  
非由近許國始名為許

以規杜氏非其義也

○夏號公忌父始作卿士于

周注周人於此遂昇之政音義

昇必二反

○四月甲辰鄭

公子忽如陳逆婦媯辛亥以媯氏歸甲寅入于鄭陳  
鍼子送女先配而後祖鍼子曰是不為夫婦誣其祖  
矣非禮也何以能育注鍼子陳大夫禮逆婦必先告

祖廟而後行故楚公子圍稱告莊共之廟鄭忽先逆

婦而後告廟故曰先配而後祖音義

鉞其廉反誣亡符反共音恭本

亦作恭

疏

注正義曰先配後祖多有異說賈逵以配為成夫婦也禮齊而未配三月廟見然後配案

昏禮親迎之夜社席相連是士禮不待三月也禹娶塗山四日即去而有啟生焉亦不三月乃配是賈之謬也鄭眾以配為同牢食也先食而後祭祖無敬神之心故曰誣其祖也案昏禮婦既入門即設同牢之饌其間無祭祀之事先祭乃食禮無此文是鄭之妄也鄭玄以祖為祫道之祭也先為配匹而後祖道言未去而行配案傳既言入于鄭乃云先配而後祖寧是未去之事也若未去先配則鉞子在陳譏之何須云送女也此三說皆滯故杜引楚公子圍告廟之事言鄭忽先逆婦而後告廟故曰先配而後祖此時忽



父見在計告廟以否當是莊公之事而譏忽者楚公子園亦人臣矣而自布几筵告於莊共之廟不言稟君之命知逆者雖受父命當自告廟且忽先為配匹而後告祖見其告祖方始譏之知忽自告祖也或可鄭伯為忽娶妻先逆而後告廟鍼子見而譏之公子園告廟者專權自由耳非正也○齊人卒

平宋衛于鄭秋會于溫盟于瓦屋以釋東門之役禮

也注會溫不書不以告也定國息民故曰禮也平宋

衛二國忿鄭之謀鄭不與盟故不書音義

與音預

○八

月丙戌鄭伯以齊人朝王禮也注言鄭伯不以虢公得政而背王故禮之齊稱人略從國辭上有七月庚

午下有九月辛卯則八月不得有丙戌音義

背音

疏

注正義曰庚午之後十六日而有丙戌二十一日而有辛卯七月有庚午九月有辛卯其間不容一月是八月不得有丙戌更遙一周則丙戌去庚午七十七日八月亦不得有丙戌是明丙戌為日誤長歷推七月丁卯朔四日庚午至二十日是丙戌九月丙寅朔二十六日辛卯其月二十一日是丙戌八月小丁酉朔十日丙午二十日丙辰二日戊戌十四日庚戌二十六日壬戌未知丙戌二字孰為誤也不直云日誤而檢上下者因傳明文

○公及莒人盟于浮來以成

故顯言之他皆放此

紀好也注二年紀莒盟于密為魯故今公尋之故曰

以成紀好音義

好呼報反注同

○冬齊侯使來告成三國注

齊侯冬來告稱秋和三國公使衆仲對曰君釋三國之圖以鳩其民君之惠也寡君聞命矣敢不承受君之明德注鳩集也○無駭卒羽父請諡與族公問族於衆仲衆仲對曰天子建德注立有德以為諸侯因生以賜姓注因其所由生以賜姓謂若舜由媯汭故

陳為媯姓音義

汭如銳反疏注正義曰陳世家云陳胡公

庶人時居于媯汭其後因為氏姓媯氏武王克殷得媯滿封之於陳是舜由媯汭故陳為媯姓也案世本帝舜姚姓哀元年傳稱虞思妻少康以二姚是自舜以下猶姓姚也昭八年傳曰及胡公不淫故周賜

之姓是胡公始姓媯耳史記以為胡公之前已姓媯非也

胙之土而命之氏注報

之以土而命氏曰陳音義

胙才故反報也

疏

注正義曰胙訓報也有德之人

必有美報報之以土謂封之以國名以為之氏諸侯之氏則國名是也周語曰帝嘉禹德賜姓曰姁氏曰有夏胙四岳國賜姓曰姜氏曰有呂亦與賜姓曰媯命氏曰陳其事同也姓者生也以此為祖令之相生雖下及百世而此姓不改族者屬也與其子孫共相連屬其傍支別屬則各自立氏禮記大傳曰繫之以姓而弗別百世而昏姻不通者周道然也是言子孫當共姓也其上文云庶姓別於上而戚卑於下是言子孫當別氏也氏猶家也傳稱盟于子哲氏逐麋狗入于華臣氏如此之類皆謂家為氏氏族一也所從言之異耳釋例曰別而稱之謂之氏合而言之則曰族例言別合者若宋之華元華喜皆出戴公向魚鱗

蕩共出桓公獨舉其人則云華氏向氏并指其宗則云戴族桓族是其別合之異也記謂之庶姓者以始祖為正姓高祖為庶姓亦氏族之別名也姓則受之於天子族則稟之於時君天下之廣兆民之眾非君所賜皆有族者人君之賜姓賜族為此姓此族之始祖耳其不賜者各從父之姓族非復人人賜也晉語稱黃帝之子二十五人其得姓者十二人天子之子尚不得姓況餘人哉固當從其父耳黃帝之子兄弟異姓周之子孫皆姓姬者古今不同質文代革周代尚文欲令子孫相親故不使別姓其賜姓者亦少唯外姓媯滿之徒耳賜族者有大功德宜世享祀者方始賜之無大功德任其興衰者則不賜之不賜之者公之同姓蓋亦自氏祖字其異姓則有舊族可稱不世其祿不須賜也眾仲以天子得封建諸侯故云朕土命氏據諸侯言耳其王朝大夫不封為國君者亦當王賜之族何則春秋之世有尹氏武氏之徒明亦

天子賜之與諸侯之臣義無異也此無駭是卿羽父為之請族蓋為卿乃賜族大夫以下或不賜也諸侯之臣卿為其極既登極位理合建家若其父祖微賤此人新升為卿以其位絕等倫其族不復因故身未被賜無族可稱魯挾鄭宛皆未賜族故卑稱名也或身以才舉暫升卿位功德猶薄未足立家則雖為卿竟不賜族羽父為無駭請族知其皆由時命非例得之也華督生立華氏知其恐慮不得故早求之也由此而言明有竟無族者魯之輩挾柔溺名見於經而其後無聞是或不得族也其士會之孥處秦者為劉氏伍員之子在齊為王孫氏外傳稱知果知知伯之將滅自別其族為輔氏如此之類皆是身自為之非復君賜釋例曰子孫繁衍枝布葉分始承其本末取其別故其流至於百姓萬姓其言自有百姓萬姓未必皆君賜也晉語稱炎帝姓姜則伯夷炎帝之後姜自是其本姓而云賜姓曰姜者黃帝之後別姓非一

自以姜姓賜伯夷更使為一姓之祖耳非復諸侯以  
因舊姓也猶后稷別姓姬不是因黃帝姓也

字注諸侯位卑不得賜姓故其臣因氏其王父字為

諡因以為族注或使即先人之諡稱以為族疏

正義曰杜

意諸侯以字言賜先人字為族也為諡因以為族謂  
賜族雖以先人之字或用先人所為之諡因將為族  
以諡為族者衛齊惡宋戴惡之類是也而劉君乃稱  
以諡為族全無一人妄規杜氏非其義也死後賜族  
乃是正法春秋之世亦有非禮生賜族者華督是也  
釋例曰舊說以為大夫有功德者則生賜族非也至  
於鄭祭仲為祭封人後升為卿經書祭仲以生賜族  
者檢傳既無同華氏之文則祭者是仲之舊氏也諸  
侯以字字有二等檀弓曰幼名冠字五十以伯仲周  
道也然則二十有加冠之字又有伯仲叔季為長幼

之字二者皆可以為氏矣服虔云公之母弟則以長  
幼為氏貴適統伯仲叔季是也庶公子則以配字為  
氏尊公族展氏臧氏是也案鄭子人者鄭厲公之弟  
桓十四年鄭伯使其弟語來盟即其人也而其後為  
子人氏不以仲叔為氏則服言公之母弟以長幼為  
氏其事未必然也杜以慶父叔牙與莊公異母自然  
仲叔非母弟族矣其或以二十之字或以長幼之字  
蓋出自時君之命也叔肸稱叔不稱孫而三桓皆稱  
孫俱氏長幼之字自不同也臧氏稱孫展氏不稱孫  
俱氏二十之字自不同也然則稱孫與不稱孫蓋出  
其家之意未必由君賜也以字為族者謂公之曾孫  
以王父之字為族也諸侯之子稱公子公子之子稱  
公孫公子公孫繫公之常言非族也其或賤責則亦  
與族同成十四年叔孫僑如如齊逆女傳曰稱族尊  
君命也僑如以夫人婦姜氏至自齊傳曰舍族尊夫  
人也宣元年公子遂如齊逆女遂以夫人至事與僑



如正同其傳直云尊君命尊夫人不言稱族舍族既  
非氏族則不待君賜自稱之矣至於公孫之子不復  
得稱公曾孫如無駭之輩直以名行及其死也則賜  
之族以其王父之字為族也此無駭是公之曾孫公  
之曾孫必須有族故據曾孫為文言以王父字耳公  
之曾孫正法死後賜族亦有未死則有族者則叔孫  
得臣是也公子公孫於身必無賜族之理經書季友  
仲遂叔肸者皆是以字配名連言之故杜注並云字  
也其蕩伯姬者公子蕩之妻不可言公子伯姬故繫  
於夫字言蕩伯姬蕩非當時之氏其傳云立叔孫氏  
臧僖伯臧哀伯叔孫戴伯之徒皆傳家據後追言之  
耳其公孟彊世本以為靈公之子字公孟名彊與李  
友仲遂相似俱以字配名劉炫不達此直妄規杜過  
非也必如劉解生賜族之文證在何處其公之曾孫  
玄孫以外爰及異姓有新升為卿君賜之族蓋以此  
卿之字即為此族案世本宋督是戴公之孫好父說

之子華父是督之字計督是公孫耳未合賜族應死  
後其子乃賜族故杜云督未死而賜族督之妄也沈  
亦云督之子  
**官有世功則有官族邑亦如之**注謂取

其舊官舊邑之稱以為族皆稟之時君音義

稱尺疏證反

注正義曰舊官謂若晉之士氏舊邑若韓魏趙氏非  
是君賜則不得為族嫌其居官邑不待公命故云皆  
稟之時君此謂同姓異姓皆然也服虔止謂異姓又  
引宋司城韓魏為證韓與司城非異姓司城又自為  
樂氏不以司  
城為族也  
**公命以字為展氏**注諸侯之子稱公子

公子之子稱公孫公孫之子以王父字為氏無駭公  
子展之孫故為展氏

經九年春天王使南季來聘注無傳南季天子大夫也

南氏季字也

三月癸酉大雨震電庚辰大雨雪注三月今正月音義

電徒練反雨雪

疏

正義曰說文云震劈歷震物者電陰陽激曜也河圖云陰陽相薄為雷陰

于付反傳同

激陽為電然則震是雷之劈歷電是雷光僖十五年震夷伯之廟是劈歷破之雷之甚者為震故何休云震雷

也說文云雨水從雲下也然則雨者天上下水之名既見雨從天下自上下者因即以雨言之雨蟲亦稱為雨

故下雪稱雨雪也平原出水為大水直書大水平地尺為大雪不直書大雪而云大雨雪者水則從天入地出

地乃為多見其在地之多言其出水之大故不言大雨水雪則自天而下下即委之於地見其自上而下言其

下雪之多故言大雨雪水則俯視雪則仰觀故立文有異其大雨電亦與雪同挾卒注無傳挾魯大夫未賜族

夏城郎

秋七月

冬公會齊侯于防注防魯地在琅邪華縣東南

傳九年春王三月癸酉大雨霖以震書始也注書癸

酉始雨日音義

霖音林爾雅云久雨謂之淫淫雨謂之霖

庚辰大雨雪亦

如之書時失也注夏之正月微陽始出未可震電既

震電又不當大雨雪故皆為時失凡雨自三曰以往

為霖注此解經書霖也而經無霖字經誤疏

注正義曰傳發

凡以解經若經無霖字則傳無由發故知經誤然則經當如傳言大雨霖以震不當云大雨震電是經脫霖以二字而平地尺為大雪○夏城郎書不時也○

妄加電也

宋公不王注不共王職音義

共音恭本亦作供

鄭伯為王左

卿士以王命討之伐宋宋以入郛之役怨公不告命

注入郛在五年公以七年伐邾欲以說宋而宋猶不

和也公怒絕宋使○秋鄭人以王命來告伐宋注遣

使致王命也伐宋未得志故復往告之○冬公會齊  
侯于防謀伐宋也○北戎侵鄭鄭伯禦之患戎師曰  
彼徒我車懼其侵軼我也注徒步兵也軼突也音義  
軼直結反又音逸公子突曰使勇而無剛者嘗寇而速去之

注公子突鄭厲公也嘗試也勇則能往無剛不恥退  
君為三覆以待之注覆伏兵也戎輕而不整貪而無  
親勝不相讓敗不相救先者見獲必務進進而遇覆  
必速奔後者不救則無繼矣乃可以逞注逞解也音

義

輕遣政反逞救領反  
解音蟹或佳買反

疏

正義曰嘗寇速去知戎必  
逐之逐其去者必有所獲

獲謂獲鄭人也在先者見逐有所獲不復顧後必務  
在速進謂棄其後者獨自先進進而遇覆必速迴奔  
走後者不救則是無繼續矣無繼則易敗如是乃可  
以解患服虔云先者見獲言必不往相救各自務進  
言其貪利也其言見獲者當謂戎被鄭獲也鄭人速  
去以誘之安得獲戎也在先者已被鄭獲重進者將  
復為虜各自務進欲何所貪而云貪  
利也此則不言可解無故以解亂之

從之戎人之前

遇覆者奔祝聃逐之注祝聃鄭大夫音義

聃乃甘反  
一音士甘

反

衷戎師前後擊之盡殪注為三部伏兵祝聃帥勇

而無剛者先犯戎而速奔以遇二伏兵至後伏兵起

戎還走祝聃反逐之戎前後及中三處受敵故曰衷

戎師殪死也音義

衷丁仲反又音忠殪於計反處昌慮反

疏

注正義曰前後及中

三處受敵者前謂第一伏逆其前也後謂祝聃與後伏逐其後也中謂第二伏擊其中也衷戎師者謂戎

師在三伏之中殪死也釋詁文

戎師大奔注後駐軍不復繼也音義

駐丁反

十一月甲寅鄭人大敗戎師注此皆春秋時事

雖經無正文所謂必廣記而備言之將令學者原始

要終尋其枝葉究其所窮他皆放此音義

令力呈反要於遙反

疏

正義曰此即上傳所說擊戎之事史官得其戰狀乃裁約為之辭經之所陳皆是此類既不書經故



準經為文  
以總之

經十年春王二月公會齊侯鄭伯于中丘注傳言正月  
會癸丑盟釋例推經傳日月癸丑是正月二十六日知  
經二月誤

夏鞏帥師會齊人鄭人伐宋注公子鞏不待公命而貪  
會二國之君疾其專進故去氏齊鄭以公不至故亦更

使微者從之伐宋不言及明鞏專行非鄭之謀也及例

在宣七年音義

去起呂反傳同

疏

注正義曰傳稱羽父先會齊侯鄭伯是不待公命也貪會

二國之君自求其名時史疾其專進故貶去公子公子義與氏同故以氏言之中丘之會計君自親行今齊鄭稱人是使微者從之也於例師出與謀曰及傳稱盟于鄧為師期公既與謀計當書及今乃言會明其以鞏專行非鄧之謀釋例曰王命伐宋羽父不匡君以速進而先會二國自以為名故貶去其族齊為侯伯鄭伯又為王卿士二君奉王命以討宋惡羽父之專進故使與微者同伐動而無功故無成敗也案四年鞏固請而行故貶去其氏此直言鞏先會齊侯鄭伯無固請之文亦貶之者又公子豫會邾人鄭人以不待公命而經不書此鞏亦不待公命而經書者鞏於四年傳稱固請明此先會亦固請也傳於四年其文已詳故於此而略耳豫會邾人鄭人本非公命故不書此則公會齊鄭于中丘已為師期鞏又請公先會先會則是君命故以書之

六月壬戌公敗宋師于菅注齊鄭後期故公獨敗宋師

書敗宋未陳也敗例在莊十一年管宋地音義

管古頑反陳直

覲疏

注正義曰案傳公會齊侯鄭伯于老桃然後公敗宋師則知老桃之會謀與宋戰彼與公謀戰而公

獨敗宋師知齊鄭後期也

辛未取郕辛巳取防注鄭後至得郕防二

邑歸功于魯故書取明不用師徒也濟陰城武縣東南

有郕城高平昌邑縣西南有西防城音義

郕古報反字林又工竺反

秋宋人衛人入鄭宋人蔡人衛人伐戴鄭伯伐取之注

三國伐戴鄭伯因其不和伐而取之書伐用師徒也書

取克之易也戴國今陳留外黃縣東南有戴城音義

戴音

載字林作戴云故國在陳留易以鼓反傳同

疏

注正義曰案傳例克邑不用師徒曰取然則取者據克邑

之易今此克得軍師亦稱取者但取者雖據克邑之文其克得師衆而易者亦曰取是以莊十一年注云威力兼備若羅網所掩覆一軍皆見禽制若非前敵之易何能覆而取之故釋例曰如取如攜然則凡言取者皆易辭劉君以取之非易而規杜氏非也沈氏亦云今日圍明日取故知易也公羊傳曰其言伐取之何易也是杜所用之義地理志云梁國留縣故戴國應劭曰章帝改曰考城古者留戴聲相近故鄭玄詩箋讀叔載為熾留是其音大同故漢於戴國立留縣於晉屬陳留

冬十月壬午齊人鄭人入郕

傳十年春王正月公會齊侯鄭伯于中丘癸丑盟于

鄧為師期注尋九年會于防謀伐宋也公既會而盟

盟不書非後也蓋公還告會而不告盟鄧魯地疏

正義曰九年傳稱會于防謀伐宋未及伐宋而更為此

會為師伐宋之期知是尋防會也釋例曰盟于鄧盟于郟盟于戚公既在會而不書盟者以理推之

○夏

五月羽父先會齊侯鄭伯伐宋注言先會明非公本

期釋鞏之去族○六月戊申公會齊侯鄭伯于老桃

注會不書不告於廟也老桃宋地六月無戊申戊申

五月二十三日日誤疏

注正義曰六月無戊申者下有辛巳取防亦在六月之內

戊申在辛巳之前三十三日不得共在一月上有五月今別言六月知日誤月不誤長歷推六月丙辰朔三日戊午五日庚申未知二者孰誤

壬戌公敗宋師于營庚午鄭師入郕辛未歸于我庚辰鄭師入防辛巳歸于我注壬戌

六月七日庚午十五日庚辰二十五日鄭伯後期而

公獨敗宋師故鄭頻獨進兵以入郕防入而不有命

魯取之推功上爵讓以自替不奪其實故經但書魯

取以成鄭志善之也君子謂鄭莊公於是乎可謂正

矣以王命討不庭注下之事上皆成禮於庭中不貪

其土以勞王爵正之體也注勞者叙其勤以答之諸

侯相朝逆之以饗餼謂之郊勞魯侯爵尊鄭伯爵卑

故言以勞王爵音義

勞力報反注同餼許氣反

疏

注正義曰聘禮賓至于近郊君

使卿朝服用束帛勞覲禮至于郊王使人皮弁用璧勞周禮司儀曰諸公相為賓主君郊勞皆不言以饗餼勞案禮饗餼乃是既相見致大禮不應於郊以設之杜意蓋以熟食曰饗生牲曰餼以勞客於郊必有牲饌故以饗餼言之非謂大禮之饗餼也勞禮大行人云上公三勞近郊勞一也遠郊勞二也竟首勞三也侯伯再勞去竟首子男一勞去遠郊凡近郊勞皆君自行遠郊使卿竟首使大夫掌客又云上公五積皆祇殮牽侯伯四積子男三積是賓入竟之後有致積之禮積雖是牽亦或有熟或在郊致積故謂之郊

勞沈依聘禮注其郊之遠近上公遠郊五十里侯伯三十里子男十里近郊各半之○蔡人衛

人邾人不會王命注不伐宋也○秋七月庚寅鄭師

入郊猶在郊注鄭師還駐兵於遠郊宋人衛人入鄭

注宋衛奇兵承虛入鄭蔡人從之伐戴注從宋衛伐

戴也八月壬戌鄭伯圍戴癸亥克之取三師焉注三

國之軍在戴故鄭伯合圍之師者軍旅之通稱音義

稱尺疏注正義曰三國之軍在戴城下故鄭伯合圍

證反疏之不言圍戴者本意圍三師不圍戴也不言

圍三師者今日圍明日取圍之不久經以取告不以

圍告三國經皆稱人於例為將卑師少而傳言三師



故辨之師者軍旅之通稱宋衛既入鄭而以伐戴召蔡人注伐戴

乃召之蔡人怒故不和而敗注言鄭取之易也○九

月戊寅鄭伯入宋注報入鄭也九月無戊寅戊寅八

月二十四日疏

注正義曰九月無戊寅者經有十月壬午長歷推壬午十月二十九日戊

寅在壬午之前四日耳故九月不得有戊寅上有八月下有冬則誤在日也

○冬齊人鄭

人入郕討違王命也

經十有一年春滕侯薛侯來朝注諸侯相朝例在文十

五年音義

薛息列反疏

正義曰十下言有者干寶云十盈則更始以奇從盈數故言有也經備文

傳從略故傳不言有桓七年穀伯鄧侯別言來朝此兼言來朝者彼別行禮此同行禮由同時行禮當長者在先故爭之

夏公會鄭伯于時來注時來邾也蒙陽縣東有釐城鄭

地也音義

邾音來釐音來王元規力之反

秋七月壬午公及齊侯鄭伯入許注與謀曰及還使許

叔居之故不言滅也許潁川許昌縣音義

與音預還音環疏注

義曰與謀曰及宣七年傳例也傳稱會于邾謀伐許是公與謀也譜云許姜姓與齊同祖堯四岳伯夷之後也周武王封其苗裔文叔于許今潁川許昌是也靈公徙葉悼公遷夷一名城父又居析一名白羽許男斯處容

城自文叔至莊公十一世始見春秋元公子結元年獲麟之歲也當戰國初楚滅之地理志云潁川郡許縣故許國文叔所封二十四世為楚所滅也漢世名許縣耳魏武作相改曰許昌

冬十有一月壬辰公薨注實弑書薨又不地者史策所

諱也疏

注正義曰他君見弑則書弑魯君見弑則書薨公薨例皆地此公又不地故解之言魯史策書

所諱也不忍言君之見弑又不忍言其僵尸之處諱而不書故夫子因之傳不言書曰知是舊史諱之也董狐書趙盾弑君仲尼謂之良史不書弑君則是史之不良夫子不改其文而因之者為人臣者或心實愛君為諱愆過或志在疾惡故章賊名雖事跡不同而俱是為國聖賢兩通其事欲見仁非一涂僖元年傳曰諱國惡禮也以仲尼之善董狐知為史必須直也以丘明之禮諱惡知為史又當諱也釋例曰臣之事君猶子事父微諫

見志造膝詭辭執其是而諫其非不必其得蓋匡救將然而將順其已然故有隱諱之義焉至於激節之士則不然南史執簡而累進董狐書法而不隱鬻拳劫君而自刎晏嬰端委而引直聖賢亦錄而善之所以廣義訓博大道殷有三仁此之謂也是言聖賢兩通之意也鄭伯髡頑楚子磨齊侯陽生之徒俱實見弑而以卒赴魯是他國之臣亦有諱國惡者非獨魯史也

傳十一年春滕侯薛侯來朝爭長注薛魯國薛縣音

義

長丁丈反下及注文同

疏

注正義曰譜云薛任姓黃帝之苗裔奚仲封為薛侯今魯國薛縣是

也奚仲遷于邳仲虺居薛以為湯左相武王復以其胄為薛侯齊桓霸諸侯黜為伯獻公始與魯同盟小國無紀世不可知亦不知為誰所滅地理志云魯國薛縣夏車正奚仲所國後遷于邳湯相仲虺居之

薛侯曰我先封注薛祖奚仲夏所封在周之前音義

夏戶疏

注正義曰定元年傳曰薛之皇祖奚仲居薛以為夏車正是夏所封也

滕侯曰

我周之卜正也注卜正卜官之長疏

注正義曰周禮春官大卜下大

夫二人其下有卜師卜人龜人筮人大卜為之長正訓長也故謂之卜正

薛庶姓也我不

可以後之注庶姓非周之同姓疏

注正義曰周禮司儀職云詔王儀南

鄉見諸侯土揖庶姓時揖異姓天揖同姓鄭玄云庶姓無親者也異姓婚姻者也是庶姓非同姓也公

使羽父請於薛侯曰君與滕君辱在寡人周諺有之

曰山有木工則度之賓有禮主則擇之注擇所宜而

行之音義

諺音彥俗言也度大洛反

周之宗盟異姓為後注盟載

書皆先同姓例在定四年疏

正義曰賈逵以宗為尊服虔以宗盟為同宗之

盟孫毓以為宗伯屬官掌作盟詛之載辭故曰宗盟

杜無明解盟之尊卑自有定法不得言尊盟也周禮

司盟之官乃是司寇之屬非宗伯也唯服之言得其

旨矣而孫毓難服云同宗之盟則無與異姓何論先

後若通共同盟則何稱於宗斯不然矣天子之盟諸

侯令其共獎王室未聞離遯異姓獨與同宗者也但

周人貴親先叙同姓以其篤於宗族是故謂之宗盟

魯人之為此言見其重宗之義執其宗盟之文即云

無與異姓然則公與族燕則異姓為賓復言族燕不

得有異姓也孟軻所云說詩者不以辭害意此之謂

也異姓為後者謂王官之伯降臨諸侯以王命而盟

者耳其春秋之世狎主齊盟者則不復先姬姓也踐

土之盟其載書云王若曰晉重魯申是用王命而盟也召陵之會劉子在焉故祝佗引踐土為比為有王官故也宋之盟楚屈建先於趙武明是大國在前不先姬姓若姬姓常先則楚不得競也且言周之宗盟是唯周乃然故釋例曰斥周而言指謂王官之宰臨盟者也其餘雜盟未必皆然是言餘盟不先姬姓盟則同姓在先朝則各從其爵故鄭康成注禮記云朝覲爵同同位若然案覲禮曰諸侯前朝皆受舍于朝同姓西面北上異姓東面北上鄭玄云言諸侯明來朝者眾矣顧其入覲不得並耳分別同姓異姓受之將有先後也若如此言則似朝覲不以爵者但朝覲實以爵同同位就爵同之中先同姓後異姓若盟則爵雖不同先同姓也禮記周公朝諸侯于明堂之位三公中階之前北面東上諸侯之位阼階之東西面北上諸伯之國西階之西東面北上諸子之國門東北面東上諸男之國門西北面東上覲禮於方明之

壇鄭言諸侯見王之位亦引明堂位為說是則諸侯  
總見皆以爵為班雖不分別同姓異姓其受禮之時  
爵同者猶先同姓也其王官之伯臨諸侯之盟雖羣  
后咸在常先同姓故此言宗盟耳取重宗之事以喻  
已也取譬之事聊舉一邊寡人若朝于薛不敢與諸  
任齒朝於彼國自可下主國之宗諸侯聚盟不肯先  
盟主之宗也 寡人若朝于薛不敢與諸任齒注薛任姓齒

列也音義

仕音壬 注同

疏

注正義曰世本氏姓篇云任姓 謝章薛舒呂祝終泉畢過言此

十國皆任姓也禮記文王世子曰古者謂年齡齒亦  
齡也然則齒是年之別名人以年齒相次列以爵位  
相次列亦名為齒故云齒列也 君若辱貺寡人則願以滕君為請薛

侯許之乃長滕侯○夏公會鄭伯于邾謀伐許也鄭



伯將伐許五月甲辰授兵於大宮注大宮鄭祖廟音

義

大音泰

公孫闕與潁考叔爭車注公孫闕鄭大夫音

義

闕於潁反

潁考叔挾輶以走注輶車輶也音義

挾音協輶張留

反

疏

正義曰廟內授車未有馬駕故手挾以走輶輶也方言云楚衛謂輶為輶服虔云考叔挾車輶

箠馬而走古者兵車一輶服馬夾之若馬已在輶不可復挾且箠馬而走非捷步所及子都豈復乘車逐之子都拔棘以逐之注子都公孫闕棘戟也及大達

弗及子都怒注達道方九軌也音義

達求龜反爾雅云九達謂之達

杜云道方九軌此依考工記

疏

注正義曰冬官考工記匠人營國經涂九軌軌車轍謂王城之內道

廣並九車也爾雅釋宮云一達謂之道路二達謂之岐旁三達謂之劇旁四達謂之衢五達謂之康六達謂之莊七達謂之劇駢八達謂之崇期九達謂之達說爾雅者皆以為四道交出復有旁通故劉炫規過以達為九道交出也今以為道方九軌者蓋以九出之道世俗所希不應城內得有此道以記有九軌故以達當之言並容九軌皆得前達亦是九達之義故李巡注爾雅亦取並軌之義又涂方九軌天子之制諸侯之國不得皆有唯鄭域之內獨有其涂故傳於鄭國每言達也故桓十四年焚渠門人及大達莊二十八年衆車人自純門及達市宣十二年人自皇門至於達路劉君以為國國皆有達道以規杜氏其義也非

○秋七月公會齊侯鄭伯伐許庚辰傳于許注傳

于許城下音義

傳音附注同

賴考叔取鄭伯之旗螫弧以

先登注螫弧旗名音義

螫莫侯反  
弧音胡

疏

注正義曰周禮諸侯建旗孤卿

建旗而左傳鄭有螫弧齊有靈姑鉦皆諸侯之旗也趙簡子有蜂旗卿之旗也其名當時為之其義不可

也知子都自下射之顛注顛隊而死音義

射食亦反下及注同隊直

類反瑕叔盈又以螫弧登注瑕叔盈鄭大夫周麾而呼

曰君登矣注周徧也麾招也音義

麾許危反又許偽反呼火故反徧音

遍鄭師畢登壬午遂入許許莊公奔衛注奔不書兵

亂遁逃未知所在音義

遁徒頓反

齊侯以許讓公公曰君

謂許不共注不共職貢音義

共音恭本亦作供音同注及下同

故從

君討之許既伏其罪矣雖君有命寡人弗敢與聞乃  
與鄭人鄭伯使許大夫百里奉許叔以居許東偏注  
許叔許莊公之弟東偏東鄙也音義與聞音預曰天禍許  
國鬼神實不逞于許君而假手于我寡人注借手于

我寡德之人以討許寡人唯是一二父兄不能共億

注父兄同姓羣臣共給億安也音義億於力反其敢以許

自為功乎寡人有弟不能和協而使餉其口於四方

注弟共叔段也餉鬻也段出奔在元年音義餉音胡說文云

寄食鬻本又作粥疏注正義曰莊公之弟逃於四方之育反又與六反故知唯是共叔段也說文云餽

寄食也以此傳言餽口四方故以寄食言之昭七年傳云餽於是鬻於是以餽余口釋言云餽餽也則餽

是餽鬻別名今人以薄鬻塗物謂之餽紙餽帛則餽者以鬻食口之名故云餽其口也其況能

久有許乎吾子其奉許叔以撫柔此民也吾將使獲

也佐吾子注獲鄭大夫公孫獲若寡人得没于地注

以壽終音義壽如字又音授天其以禮悔禍于許注言天加

禮於許而悔禍之無寧茲許公復奉其社稷注無寧

寧也茲此也音義復扶又反又音服唯我鄭國之有請謁焉

如舊昏媾注謁告也婦之父曰昏重昏曰媾音義

媾古

豆反重疏

注正義曰謁告也釋詁文婦之父曰昏釋直龍反親文也媾與昏同文故先儒皆以為重昏

曰其能降以相從也注降降心也無滋他族實偏處

此以與我鄭國爭此土也吾子孫其覆亡之不暇而

况能禋祀許乎注絜齊以享謂之禋祀謂許山川之

祀音義

覆芳服反暇行嫁反禋音因齊側皆反本亦作齊

疏

注正義曰釋詁云禋祭也孫炎

曰禋絜敬之祭周語曰精意以享禋也是絜齊以享謂之禋享訓獻也言絜清齊敬以酒食獻神也禮諸

侯祭山川之在其地者若其受許之土則當祭許山川故知祀謂許山川之祀

寡人之使吾

子處此不唯許國之為亦聊以固吾圉也注圉邊垂

也音義

為于偽反疏注正義曰釋詁云圉垂圍魚呂反也舍人曰圉邊垂也

乃使公

孫獲處許西偏曰凡而器用財賄無實於許我死乃

亟去之吾先君新邑於此注此今河南新鄭舊鄭在

京兆音義

賄呼罪反字林音悔實之豉反置也亟紀力反急也下注同

疏

注正義曰地理

志云河南郡新鄭縣詩鄭桓公之子武公所國是知新邑於此謂河南新鄭也且志又云京兆鄭縣周宣王弟鄭桓公邑是知舊鄭在京兆也志又云本周宣王弟友為周司徒食采於宗周畿內是為鄭桓公桓公問於史伯曰王室多故何所可以逃死史伯為桓公謀取虢鄆之地令寄帑與賄而虢鄆受之後三年

幽王敗桓公死其子武公與平王東遷卒定虢郕之地然則傳云先君新邑於此謂武公始居此也史記鄭世家稱虢郕自分十邑獻於桓公桓公竟國之案鄭語桓公始謀未取之也武公始國非桓公也全滅虢郕非獻邑也馬遷之言皆謬耳昭十六年傳子產謂韓宣子曰我先君桓公與商人皆出自周以父殺此地而共處之者謂寄帑與賄之時

商人即與俱行耳非桓公身至新鄭

王室而既卑矣

周之子孫日失其序注鄭亦周之子孫夫許大岳之

亂也注大岳神農之後堯四岳也亂繼也音義

大岳音泰

疏

注正義曰周語稱共工伯鯀二者皆黃炎之後言鯀為黃帝之後共工為炎帝之後炎帝則神農之

別號周語又稱堯命禹治水共之從孫四岳佐之胙四岳國命為侯伯賜姓曰姜氏曰有呂賈逵云共共



工也從孫同姓末嗣之孫四岳官名大岳也主四岳之祭焉姜炎帝之姓其後變易至於四岳帝復賜之祖姓以紹炎帝之後以此知大岳是神農之後堯四岳也以其主岳之祀尊之故稱大岳許國是其後也

亂繼也釋詁文舍人云亂繼世也

天而既厭周德矣吾其能與許爭

乎君子謂鄭莊公於是乎有禮禮經國家定社稷序

民人利後嗣者也許無刑而伐之服而舍之注刑法

也音義

厭於疏

正義曰經謂紀理之若詩之經營經始也國家非禮不治社稷得禮乃安

故禮所以經理國家安定社稷以禮教民則親戚和睦以禮守位則澤及子孫故禮所以次序民人利益後嗣經國家猶詩度德而處之量力而行之相時而序之言經夫婦也

動無累後人注我死乃亟去之無累後人音義

度待洛反

量音良下同相息亮反累劣偽反注同

可謂知禮矣○鄭伯使卒出緫

行出犬雞以詛射潁考叔者注百人為卒二十五人

為行行亦卒之行列疾射潁考叔者故令卒及行間

皆詛之音義

卒尊忽反注同緫音加猪別名行疏注戶剛反注同詛側慮反令力呈反正

義曰周禮夏官序制軍之法百人為卒二十五人為兩此言二十五人為行者以傳先卒後行緫大於犬知行之人數少於卒也軍法百人之下唯有二十五人為兩耳又大司馬之屬官行司馬是中士軍之屬官兩司馬亦中士知周禮之兩即此行是也周禮之行謂軍之行列知此行亦卒之行列也詛者盟之細

殺牲告神令加之殃咎疾射頽考叔者令卒及行間  
祝詛之欲使神殺之也一卒之內已用一殽又更令  
一行之間或用雞或用犬重視詛之犬雞者或雞或  
犬非雞犬並用何則盟詛例用一牲不用二也殽謂  
豕之牡者爾雅釋獸豕牝曰貍貍者是牝知殽者是  
牡祭祀例不用牝且宋人謂宋朝為艾殽明以雄猪  
也喻君子謂鄭莊公失政刑矣政以治民刑以正邪既

無德政又無威刑是以及邪注大臣不睦又不能用

刑於邪人音義

邪似嗟反下及注同

邪而詛之將何益矣○王

取鄔劉注二邑在河南緱氏縣西南有鄔聚西北有

劉亭音義

鄔烏戶反緱古候反一音苦候反聚才遇反

為邠之田于鄭注

為邗鄭二邑音義

為尤委反邗音于

而與鄭人蘇忿生之田

注蘇忿生周武王司寇蘇公也音義

忿芳疏粉反

注正義曰成十

一年傳曰昔周克商使諸侯撫封蘇忿生以溫為司寇尚書立政稱周公告大史曰司寇蘇公是其事也

溫注今溫縣原注在沁水縣西音義

沁七侵反字林先衽反郭璞三

蒼解詁音狗沁之沁沈文阿疏鳩反韋昭思金反水名

絺注在野王縣西南音

義

絺敕之反

樊注一名陽樊野王縣西南有陽城音義

樊扶

袁反

隰郕注在懷縣西南音義

隰詳立反郕尚征反

欒茅注在脩

武縣北音義

欒才官反

向注軹縣西有地名向上音義

向舒

亮反注同  
軹音紙

盟注今盟津音義

孟盟音

州注今州縣陞注

闕音義

陞音刑

隤注在脩武縣北音義

陞徒反

懷注今懷

縣凡十二邑皆蘇忿生之田櫟茅隤屬汲郡餘皆屬

河內君子是以知桓王之失鄭也怒而行之德之則

也禮之經也已弗能有而以與人人之不至不亦宜

乎注蘇氏叛王十二邑王所不能有為桓五年從王

伐鄭張本○鄭息有違言注以言語相違恨息侯伐

鄭鄭伯與戰于竟息師大敗而還注息國汝南新息

縣音義

竟音境息一  
本作鄭音息

疏

注正義曰世本息國姬姓此  
息侯伐鄭責其不親親知與

鄭國同姬姓也莊十四年傳楚文王滅息其初則不

知誰之乎何時封也地理志汝南郡有新息縣故息

國也應劭云其後東徙故加新云若其後東徙當

云故息何以反加新字乎蓋本自他處而徙此也君

子是以知息之將亡也不度德注鄭莊賢音義

度待  
洛反

不量力注息國弱不親親注鄭息同姓之國不徵辭

不察有罪注言語相恨當明徵其辭以審曲直不宜

輕鬪犯五不韙而以伐人其喪師也不亦宜乎注韙

是也音義

韙韋鬼反蒼頡  
篇同喪息浪反

○冬十月鄭伯以虢師伐

宋壬戌大敗宋師以報其入鄭也注入鄭在十年宋

不告命故不書凡諸侯有命告則書不然則否注命

者國之大事政令也承其告辭史乃書之于策若所

傳聞行言非將君命則記在簡牘而已不得記於典

策此蓋周禮之舊制音義傳直師出臧否亦如之注

臧否謂善惡得失也臧而告敗勝而告克此皆互言

不須兩告乃書音義否音鄙又方雖及滅國滅不告

敗勝不告克不書于策疏正義曰此傳雖因宋不告

敗而發此例其言諸侯有

命非獨為被伐之命故注云命者國之大事政令也  
謂諸是大事崩卒會盟戰伐克取君臣乖離水火災  
害經書他國之事皆是來告則書不告則否來告則  
書者或彼以實告改其告辭而書之或彼以虛告因  
其虛言而記之立文褒貶章示善惡雖復依告者多  
不必盡皆依告衛獻公之出奔也傳稱孫林父甯殖  
出其君名在諸侯之策及其書經則云衛侯出奔齊  
如此之類是改告辭也晉人之敗秦也傳稱潛師夜  
起以敗秦于令狐秦實未陳不與晉戰晉人諱背前  
言妄以戰告及其書經乃言晉人及秦人戰于令狐  
如此之類是因虛言也雖復或因其虛或改其實終  
是歸於勸戒而告乃書也不然則否者雖復傳聞行  
言實知其事但非故遣來告知亦不書所以慎謬誤  
辟不審若楚滅六蓼臧文仲歎而為言魯非不知但  
無命來告故不書也師出臧否亦如之者傳因被兵  
發例嫌出師伐人不必須告故重明之雖及滅國者



既據侵伐發例又嫌滅國事重不待告命故更明之言不書于策者明告命大事皆書於國史正策以見仲尼脩定悉因正策之文注正義曰不言勝敗而言臧否者明其臧否之言非徒勝敗之謂故知是善惡得失總謂理有曲直兵有彊弱也狄伐邢之類非狄能告也楚滅庸之徒非庸能告也故知敗克互言不須兩告乃書也且哀元年傳曰吳入越不書吳不告慶越不告敗也吳越並言知其不待兩告○羽

父請殺桓公將以求大宰注大宰官名音義

大音泰注同

疏

注正義曰周禮天子六卿天官為大宰諸侯則并六為三而兼職焉昭四年傳稱季孫為司徒叔孫

為司馬孟孫為司空則魯之三卿無大宰也羽父名見於經已是卿矣而復求大宰蓋欲令魯特置此官以榮已耳以後更無公曰為其少故也吾將授之矣

注授桓位音義

為于偽反  
少詩照反

使營菟裘吾將老焉注菟

裘魯邑在泰山梁父縣南不欲復居魯朝故別營外

邑音義

菟兔都反裘音求父  
音甫復扶又反下同

羽父懼反譖公于桓公

而請弑之公之為公子也與鄭人戰于狐壤止焉注

內諱獲故言止狐壤鄭地音義

譖側鵠反弑音試  
下同一本作殺

鄭

人囚諸尹氏注尹氏鄭大夫賂尹氏而禱於其主鍾

巫注主尹氏所主祭音義

賂音路禱丁老反或  
多報反巫亡夫反

遂與

尹氏歸而立其主注立鍾巫於魯十一月公祭鍾巫

齋于社圃注社圃園名音義

圃布古反

館于爲氏注館舍

也爲氏魯大夫音義

爲于委反

壬辰羽父使賊殺公于爲

氏立桓公而討爲氏有死者注欲以殺君之罪加爲

氏而復不能正法誅之傳言進退無據疏

正義曰劉炫云羽父

遣賊殺公公非爲氏所弑公在爲氏而死遂誣爲氏弑君欲以正法誅之君非爲氏所弑故討爲氏之家僅有死者而已言不總誅之注正義曰劉炫云欲以弑君之罪加爲氏則君非爲氏所弑而復不能以正法誅之正法謂滅其族汙其宮也傳言此者進退無據進誅爲氏則實非爲氏弑君退舍爲氏則無弑君之人是其進退無據也

不書葬不成喪也注桓弑隱篡立故喪

禮不成

春秋左傳注疏卷三

春秋左氏傳注疏卷三考證

鄭人來渝平○

臣浩

按公羊穀梁經俱作輸平故解作

隨成左氏經作渝平故解作更成

傳九宗注唐叔始封受懷姓九宗○

臣召南

按定四年

傳注曰懷姓唐之餘民

傳納諸郢○

臣召南

按郢地杜注闕所在史記集解引

世本曰唐叔居郢宋忠曰郢地今在大夏

傳京師來告饑注告饑不以王命故傳言京師而不書

于經也○趙汭補注曰京師于列國不可言告糴既實是糴不得言歸粟又不可但言告饑來者微故皆不書於策

天王使凡伯來聘戎伐凡伯于楚丘以歸注楚丘衛地在濟陰城武縣西南○臣召南按城武依漢志晉志

應作成武

傳告終稱嗣也○監本脫稱字今添

蔡侯考父卒疏若父與彼盟彼君雖在此子不得以其

名赴以此名未與彼君對稱故也○推尋文義當作  
若父不與彼盟脫不字

傳公命以字為展氏注無駭公子展之孫故為展氏○  
劉敞曰若無駭為公子展之孫當其繼大宗時賜氏  
久矣何待死而後賜族乎無駭固公孫羽父請族者  
為其子請也

三月癸酉大雨震電庚辰大雨雪疏水則俯視雪則仰  
觀○臣召南按此論鑿矣傳謂平地尺為大雪不俯

視乎

公會齊侯于防注防魯地在琅邪縣東南○

臣召南按

晉時有琅邪國無琅邪縣東萊集解引此注作在琅邪華縣東南是也刊本脫華字耳華縣故城在今山東費縣

辛未取郛辛巳取防注濟陰城武縣東南有郛城高平

昌邑縣西南有西防城○

臣召南

按城武應作成武

此防與前年會齊侯于防者名同地異彼是東防近



齊此是宋地在魯西南故杜氏另解

傳向注軹縣西有地名向上○

臣召南

按此向與莒人

入向不同故杜注另解

傳遂與尹氏歸而立其主○尹監本訛鄭今改正

春秋左傳注疏卷三考證

謹案第四頁後六行疏空告他人刊本監本毛本  
告訛言據宋本改

第十頁後一行疏使共湯沐焉諸本共訛其據宋  
本改

後二行疏因立別廟諸本別訛周據宋本改

第十八頁前七行疏不須賜也諸本須訛盡據宋  
本改

後三行疏暫升卿位諸本暫訛者據宋本改

第二十一頁前六行疏雨螽亦稱為雨刊本螽訛

螽今改

後五行注在琅邪華縣東南諸本脫華字據宋本

增

第二十九頁後一行疏造膝詭辭刊本詭訛跪今

改

後二行疏聖賢亦錄而善之諸本善訛言據宋本

改

後六行音義下及注文同諸本訛作注及下文同

據釋文改

第三十一頁後七行以爵位相次列諸本相訛用

據宋本改

第三十九頁前六行注此皆互言諸本言訛告據

宋本改



欽定四庫全書

覆校官編修臣張秉愚

校對官修撰臣張書勲

謄錄監生臣徐大豐

欽定四庫全書薈要

經部

左傳注疏卷四

詳校官原任侍講臣王燕緒





欽定四庫全書薈要卷一千一百二十

經部

春秋左傳注疏卷四

起桓公元年盡二年

晉杜氏注

唐陸德明音義

孔穎達疏

桓公音義

陸曰桓公名軌惠公之子隱公之弟母疏仲子史記亦名允諡法辟土服遠曰桓

義

曰魯世家桓公名允惠公之子隱公之弟仲子

所生以桓王九年即位莊王三年薨世本桓公名軌

世族譜亦為軌諡法辟土服遠曰桓諡法非一略舉一耳亦不知本以何行而為此諡他皆放此是歲歲

在玄

經元年春王正月公即位注嗣子位定於初喪而改元

必須踰年者繼父之業成父之志不忍有變於中年也  
諸侯每首歲必有禮於廟諸遭喪繼位者因此而改元  
正位百官以序故國史亦書即位之事於策桓公篡立  
而用常禮欲自同於遭喪繼位者釋例論之備矣音義

篡立初疏

注正義曰顧命曰乙丑成王崩使齊侯呂伋以二千戈逆子釗于南門之外延入翼室恤

宅宗孔安國云明室路寢延之使居憂為天下宗主天子初崩嗣子定位則諸侯亦當然也釋例曰尚書顧命天子在殯之遺制也推此亦足以準諸侯之禮矣是知嗣子位定於初喪孝子緣生以事死歲之首日必朝事宗廟因即改元釋例曰襄二十九年經書春王正月公在楚傳曰釋不朝正於廟也然則諸侯每歲首必有禮

於廟今遭喪繼立者每新年正月亦改元正位百官以序故國史因書即位於策以表之此新君之常禮也桓之於隱本無君臣之義計隱公之死桓公即合改元不假踰年方行即位猶如晉厲被弑悼公即位改元今桓雖實篡立歸罪寯氏詐言不與賊謀而用常禮自同於遭喪繼位者亦既實即其位國史依實書之仲尼因而不改反明公實篡立而自同於常亦足見桓之篡也

三月公會鄭伯于垂鄭伯以璧假許田音義

假舉下反

夏四月丁未公及鄭伯盟于越注公以篡立而修好於鄭鄭因而迎之成禮於垂終易二田然後結盟垂犬丘衛地也越近垂地名鄭求祀周公魯聽受祊田令鄭廢

泰山之祀知其非禮故以壁假為文時之所隱音義

呼好

報反傳同近附近之近疏注正義曰成會禮於垂既易

次假田然後書盟也言迎之成禮於垂者垂是衛地沈以為公迎鄭伯於垂知時史之所隱諱者傳不言書曰知非仲尼新意也

秋大水注書災也傳例曰凡平原出水為大水

冬十月

傳元年春公即位修好于鄭鄭人請復祀周公卒易

祊田注事在隱八年音義

又復扶反

公許之三月鄭伯以

壁假許田為周公祊故也注魯不宜聽鄭祀周公又

不宜易取祊田犯二不宜以動故隱其實不言祊稱

壁假言若進壁以假田非久易也音義

為于疏注正偽反義曰

祊薄於許加之以壁易取許田非假借之也今經乃以壁假為文故傳言為周公祊故解經壁假之言也

注又解傳之意周公非鄭之祖魯不宜聽鄭祀周公天子賜魯以許田義當傳之後世不宜易取祊田於

此一事犯二不宜以動故史官諱其實不言以祊易許乃稱以壁假田言若進壁於魯以權借許田非久

易然所以諱國惡也不言以祊假而言以壁假者此壁實入於魯但諸侯相交有執圭壁致信命之理今

言以壁假似若進壁以致辭然故壁猶可言祊則不可言也何則祊許俱地以地借地易理已章非復得

為隱諱故也

○夏四月丁未公及鄭伯盟于越結祊成也

注結成易二田之事也傳以經不書祊故獨見祊音

義

見賢遍反

盟曰渝盟無享國注渝變也音義

渝羊朱反享許丈反

疏

注正義曰釋言文也傳載其盟辭者以易田惡事而誓不變改見其終無悔心所以深惡魯也此時

許田已入於鄭而詩頌僖公云居常與許復周公之

宇蓋僖公之時復得之也齊人取謹及闡及其歸也

經復書之自此以後不書鄭人來歸許田者此經

書假言若暫以借鄭地仍魯物不得書鄭人歸之

秋大水凡平原出水為大水注廣平曰原疏

正義曰洪範云

水曰潤下言雨自上而下浸潤於土陂鄣下地可使水潦停焉平原高地則不宜有也凡平原出水則為

大水平原出水言水不入於土而出於地上非湧泉出也正義曰釋地文也李巡曰謂土地寬博而平正名之  
○冬鄭伯拜盟注鄭伯若自來則經不書若

遣使則當言鄭人不得稱鄭伯疑謬誤音義

使所疏

注正義曰六年傳云魯為其班後鄭注云魯親班齊饋則亦使大夫戍齊矣經不書蓋史闕文然則經所不書自有闕文之類注既疑此事不云闕文而云謬誤者師出征伐責賤皆書經所不書必是文闕若其事重使人雖賤亦書鄭人來渝平齊人歸謹及闡是也今以拜盟事輕若其使賤則例不合書故杜云若遣使來傳當云鄭人疑傳謬誤知非實是鄭伯為不見公不書者以魯鄭相親易田結好鄭伯既拜盟而來魯君無容不見故知非○宋華父督見孔父之妻實是鄭伯止是鄭人而已

于路注華父督宗戴公孫也孔父嘉孔子六世祖音

義

華戶化反大夫氏疏注正義曰案世本云華父督也後皆同督音篤

宗戴公之孫好父說之子孔

父嘉生木金父木金父生祁父其子奔魯為防叔防叔生伯夏伯夏生叔梁紇叔梁紇生仲尼是孔父嘉

為孔子六世祖

目逆而送之曰美而豔注色美曰豔音義

以豔

瞻反美疏正義曰未至則目逆既過則目送俱是目色也

疏也故以目冠之美者言其形貌美豔者言

其顏色好故曰美而豔為二事之辭色美曰豔詩毛傳文也

經二年春王正月戊申宗督弑其君與夷及其大夫孔

父注稱督以弑罪在督也孔父稱名者內不能治其閨



門外取怨於民身死而禍及其君音義

閨音圭

疏

正義曰凡言其

者是其身之所有君是臣之君故臣弑君則云弑其君  
臣是君之臣故君殺臣則云殺其大夫子亦君之子故  
云殺其世子稱國稱人以殺亦言其者人與國並舉一  
國之辭君與大夫皆是國人所有故亦言其也若兩臣  
相殺死者非殺者所有則兩書名氏不得言其則王札  
子殺召伯毛伯是也與夷是督之君言弑其君則可孔  
父非督之大夫而言及其大夫者與君俱死據君為文  
言宋督弑其君據督為文而上弑其君也言及其大夫  
孔父據君為文而下及其大夫言及與夷之大夫非督  
之大夫也仇牧荀息其意亦同注正義曰宣四年傳例  
曰弑君稱君君無道也稱臣臣之罪也故知稱督以弑  
罪在督也諸言父者雖或是字而春秋之世有齊侯祿  
父蔡侯考父季孫行父衛孫林父乃皆是名故杜以孔  
父為名文七年宋人殺其大夫傳曰不稱名衆也且言

非其罪也不名者非其罪則知稱名者皆有罪矣杜既以孔父為名因論為罪之狀內不能治其閨門使妻行於路令華督見之外取怨於民使君數攻戰而國人恨之身死而禍及其君故書名以罪孔父也釋例曰經書宗督弑其君與夷及其大夫孔父仲尼丘明唯以先後見義無善孔父之文孔父為國政則取怨於民治其家則無閨闈之教身先見殺禍遂及君既無所善仇牧不警而遇賊又死無忠事晉之荀息期欲復言本無大節先儒皆隨加善例又為不安經書臣蒙君弑者有三直是弑死相及即實為文仲尼以督為有無君之心改書一事而已無他例也是以孔父行無可善書名罪之也索公羊穀梁及先儒皆以善孔父而書字知不然者案宋人殺其大夫司馬傳稱握節以死故書其官又宋人殺其大夫傳以為無罪不書名今孔父之死傳無善事故杜氏之意以父為名言若齊侯祿父宋公茲父之等父既是名孔則為氏猶仇牧荀息被殺皆書名氏蓋孔

父先世以孔為氏故傳云督攻孔氏也婦人之出禮必擁蔽其面孔父妻行令人見其色美是不能治其閨門又殤公之好攻戰孔父湏伏死而爭乃從君之非是取怨於百姓事由孔父遂禍及其君似公子比劫立加弑君之罪杜君積累其惡故以書名責之劉君不達此旨妄為規過非也

滕子來朝注無傳隱十一年稱侯今稱子者蓋時王所

黜疏

注正義曰杞行夷禮傳每發之此不發傳非為夷禮自是以下滕常稱子故疑為時王所黜於時周

桓王也東周雖則微弱猶為天下宗主尚得命邾為諸侯明能黜滕為子爵

三月公會齊侯陳侯鄭伯于稷以成注成平也宗

有弑君之亂故為會欲以平之稷宗地疏

注正義曰成平釋詁文也

宣十五年傳晉侯治兵于稷治兵欲以禦秦明其不出  
晉境故以稷為河東之稷山此欲平宋故以稷為宋地

夏四月取郕大鼎于宋戊申納于大廟注宋以鼎賂公

大廟周公廟也始欲平宋之亂終於受賂故備書之戊

申五月十日音義

郕古報反大音疏注正義曰禮記明  
泰傳大廟倣此堂位稱魯君季夏

六月以禘禮祀周公於大廟文十三年公羊傳曰周公  
稱大廟故知大廟周公廟也始欲平宋亂故會于稷終  
舍宗罪而受其賂故得失備書之始書成宋亂終書取  
郕鼎是其備書之也鄭衆服虔皆以成宋亂為成就宋  
亂故以此言正之長歷此年四月庚午朔其月無  
戊申五月己亥朔十日得戊申是有日而無月也

秋七月杞侯來朝注公即位而來朝

蔡侯鄭伯會于鄧注潁川召陵縣西南有鄧城音義

上召

照疏

注正義曰賈服以鄧為國言蔡鄭會于鄧之國都釋例以此潁川鄧城為蔡地其鄧國則義陽鄧縣

是也以鄧是小國去蔡路遠蔡鄭不宜遠會其都且蔡鄭懼楚始為此會何當反求近楚小國而與之結援故

知非鄧國也

九月入杞注不稱主帥微者也弗地曰入音義

帥所類反或作

師

公及戎盟于唐冬公至自唐注傳例曰告于廟也特相

會故致地也凡公行還不書至者皆不告廟也隱不書

至謙不敢自同於正君書勞策勲疏

注正義曰釋例曰凡盟有一百五公

行一百七十六書至者八十二其不書至者九十四皆不告廟也隱公之不告謙也餘公之不告慢於禮也是言不告不書之意也知隱不書至為謙者以隱是讓位賢君必不慢於宗廟假使情慢宗廟止可時或失禮不應終隱之身竟不書至知其以謙之故勞非所憚勲無可紀不敢自同於正君書勞策勲故不告至也

傳二年春宋督攻孔氏殺孔父而取其妻公怒督懼

遂弑殤公君子以督為有無君之心而後動於惡注

雖有君若無也故先書弑其君會于稷以成宋亂為

賂故立華氏也注經稱平宋亂者蓋以魯君受賂立

華氏貪縱之甚惡其指斥故遠言始與齊陳鄭為會  
之本意也傳言為賂故立華氏明經本書平宋亂為  
公諱諱在受賂立華氏也猶辟假許田為周公祊故  
所謂婉而成章督未死而賜族督之妄也音義為賂于偽

反注除為會一字並同疏正義曰諸傳言君子者或惡其烏路反婉於阮反當時賢者或指斥仲尼或語出丘明之意而託諸賢者期於明理而已不復曲為義例唯河陽之狩趙盾之弑洩冶之罪危疑之理須取聖證故特稱仲尼以明之其餘皆託諸君子君子者其可以居上位子下民有德之美稱也此言先書弑君則是仲尼新意不言仲尼而言君子者欲見君子之人意皆然非獨仲尼也督有無君之心而先

書弑君者君人執柄臣人畏威每事稟命而行不敢  
妄相殺害督乃專殺孔父而取其妻非有忌君之心  
全無敬上之意不臣之迹在心已久非為公怒始興  
毒害若先書孔父後書弑君便似既殺孔父始有惡  
心今先書弑君後書孔父見其先有輕君之心以著  
不義之極故也注正義曰傳言為賂故立華氏解經  
以成宋亂之言也成宋亂者欲殺賊臣定宋國今乃  
受貨賂立華氏非是平亂之狀而傳以解經故注申  
通其義以成宋亂者是四國為會之本謀及其既會  
違背前謀非徒不討宋督乃更為立華氏宋亂實不  
平而經書平宋亂者蓋以魯君受賂立華氏貪貨縱  
賊為惡之甚時史惡其指斥不可言四國為會縱賊  
取財故遠言為會之本意言會于稷欲以平宋亂也  
傳以經文不實解其諱之所由所諱者諱其受賂立  
華氏故也為周公祊故文與此同故以類相明然案  
為周公祊故故字在下而向上結之此亦應云為賂



立華氏故也何以此文故字乃在立華氏之上為賂之下者以周公祊故其文約少得以故字在下總而結之此則文句長緩不可總而結之先舉為賂惡重所以云為賂故也然後始言立華氏備詳其事今定本有故字檢晉宋古本往往無故字者妄也襄三十年諸侯之卿會于澶淵謀歸宋財既而無歸書曰宋災故尤之也此書成宋亂知非譏受賂尤四國者澶淵之會貶卿稱人是尤之文此則具序君爵辭無貶責非尤過之狀知為諱故而本其會意從其平文也文十七年晉會諸侯于扈欲以平宋之亂既而不討受賂而還其事與此正同而經書諸侯會于扈傳曰書曰諸侯無功也此亦無功不言諸侯會于稷而歷序諸國者扈之會晉為伯會諸侯以討亂乃受賂而還猶如僖十四年諸侯城緣陵齊桓為伯城而不終故貶稱諸侯此則齊陳鄭自相平亂故不加貶文知不為公諱不貶諸侯者以狄泉之諱唯沒公文其餘

皆貶此若必諱唯湏沒公而已何湏不貶諸國宣四年公及齊侯平莒及郟成平同義而彼言平此言成者史官非一置辭不同猶暨之與及更無他義所謂史有文質不必改也文十三年傳稱衛侯鄭伯請平于晉公皆成之是

宋殤公立十年十一戰注殤公以

知成平義無異也

隱四年立十一戰皆在隱公世疏

注正義曰服虔云與夷隱四年即位

一戰伐鄭圍其東門再戰取其禾皆在隱四年三戰取邾田四戰邾鄭入其郛五戰伐鄭圍長葛皆在隱五年六戰鄭伯以王命伐宋在隱九年七戰公敗宋師于菅八戰宋衛入鄭九戰宋人蔡人衛人伐戴十戰戊寅鄭伯入宋皆在隱十年十一戰鄭伯以民不號師大敗宋師在隱十一年是皆在隱公世也

堪命孔父嘉為司馬督為大宰故因民之不堪命先

宣言曰司馬則然注言公之數戰則司馬使爾嘉孔

父字音義

大音泰  
數音朔

已殺孔父而弑殤公召莊公子鄭

而立之以親鄭注莊公公子馮也隱三年出居于鄭

馮入宋不書不告也音義

馮皮水  
反下同

以郕大鼎賂公注

郕國所造器也故繫名於郕濟陰城武縣東南有北

郕城疏

注正義曰穀梁傳曰郕鼎者郕之所為也孔  
子曰名從主人故曰郕大鼎也公羊傳曰器

從名地從主人其意言器從本主之名地從後屬主  
人是知郕國所造故繫名於郕劉君難杜注郕國濟  
陰城武縣東南有北部城郕宋邑濟陰城武縣東南  
有郕城俱是城武縣東南相去不遠何得所為郕國

所為宋邑劉以南部北部並宋邑別有部國以規杜氏知不然者以許田許國相去非遙則部國部邑何妨相近且杜言有者皆是疑辭何得執杜之疑以規其過如劉所解部國竟在何處齊陳鄭皆

有賂故遂相宋公音義

相息亮反下注傳相同

○夏四月取部

大鼎于宋戊申納于大廟非禮也臧哀伯諫曰注臧

哀伯魯大夫僖伯之子君人者將昭德塞違以臨照

百官猶懼或失之故昭令德以示子孫是以清廟茅

屋注以茅飾屋著儉也清廟肅然清淨之稱也音義

著張慮反後不音者同稱尺證反

疏

正義曰君人謂與人為君也昭德謂昭明善德使德益章聞也

塞違謂閉塞違邪使違命止息也德者得也謂內得於心外得於物在心為德施之為行德是行之未發者也而德在於心不可聞見故聖王設法以外物表之儉與度數文章聲名皆是昭德之事故傳每事皆言昭是昭其德也自不敢易紀律以上言昭德耳都無塞違之事自滅德立違以下言違德之事德之與違義不並立德明則違絕故昭德之下言塞違違立則德滅故立違之上言滅德立違謂建立違命之臣知塞違謂遏絕違命之人也國家之敗謂邦國喪亡知猶懼或失之謂恐失國家此諫辭有首尾故理互相見注正義曰冬官考工記有葺屋瓦屋則屋之覆蓋或草或瓦傳言清廟茅屋其屋必用茅也但用茅葺屋更無他文明堂位曰山節藻梲複廟重檐刮楹達鄉反玷出尊崇玷康圭疏屏天子之廟飾也其飾備物盡文不應以茅為覆得有茅者杜云以茅飾屋著儉也以茅飾之而已非謂多用其茅總為覆蓋猶

童子垂髦及蔽膝之屬示其存古耳白虎通曰王者所以立宗廟何緣生以事死敬亡若存故以宗廟而事之此孝子之心也宗者尊也廟者貌也象先祖之尊貌然則象尊之貌享祭之所嚴其舍宇簡其出入其處肅然清靜故稱清廟清廟者宗廟之大稱詩頌清廟者祀文王之歌故鄭玄以文王解之言天德清明文王象焉故稱清廟此則廣指諸廟非獨文王故以清淨解之

大路越席注大路

玉路祀天車也越席結草音義

越戶括反祀天車本或無天字者非疏

注正義曰路訓大也君之所在以大為號門曰路門寢曰路寢車曰路車故人君之車通以路為名也周禮巾車掌王之五路鄭玄云王在焉曰路彼解天子之車故云王在耳其實諸侯之車亦稱為路路之最

大者巾車五路玉路為大故杜以玉路為大路巾車云玉路錫樊纓十有再就建大常十有二旂以祀故

云祀天車也越席結蒲為席置於玉路之中以茵藉  
示其儉也經傳言大路者多矣注者皆觀文為說尚  
書顧命陳列器物有大輅綴輅先輅次輅孔安國以  
為玉金象以飾車以其偏陳諸路故以周禮次之僖  
二十八年王賜晉文公以大輅之服定四年祝佗言  
先王分魯衛晉以大路注皆以為金路以周禮金路  
同姓以封王路不可以賜故知皆金路也襄十九年  
王賜鄭子驍以大路二十四年王賜叔孫豹以大路  
二注皆云大路天子所賜車之總名以周禮孤乘夏  
篆卿乘夏縵釋例以所賜穆叔子驍當是革木二路  
故杜以大路為賜車之總名服虔云大路木路杜不  
然者以大路越席猶如清廟茅屋清廟之華以茅飾  
屋示儉玉路之美以越席示質若大路是木則與越  
席各為一物豈清廟與茅屋又為別乎故杜以大路  
為玉路於玉路而施越席是方可以示儉故沈氏云  
玉路雖文亦以越席示儉而劉君橫生異義以大路

為木路妄規杜氏非也

**大羹不致注**大羹肉汁不致五味疏注

正

義曰郊特牲云大羹不和貴其質也儀禮士虞特牲皆設大羹清鄭玄云大羹清煮肉汁也不和貴其質設之所以敬尸也是祭祀之禮有大羹也大羹者大古初食肉者煮之而已未有五味之齊祭神設之所不致而不忘本也記言大羹不和故知不致者以敬而不忘本也記言大羹不和故知不致者不致五味五味即洪範所云酸苦辛鹹甘也

**染食**

**不鑿注**黍稷曰染不精鑿音義

染音咨稷也食音嗣餅也鑿子洛反精米

也字林作穀子沃反云糲米一斛春為八斗

**疏**

注正義曰釋草云染稷舍人曰染一名稷稷粟也郭

璞云今江東人呼粟為染士虞記云明齊鄭云今文曰明染染稷也然則染是稷之別名但稷是諸穀之長染亦諸穀總名周禮小宗伯辨六梁之名物鄭玄云六染謂黍稷稻粱麥苽是諸穀皆名染也祭祀用



穀黍稷為多故云黍稷曰粢飯謂之食傳云粢食不  
鑿謂以黍稷為飯不使細也九章算術粟率五十鑿  
二十四言粟五斗為米二  
斗四升是則米之精鑿

昭其儉也注此四者皆示

儉衮冕黻珽注衮畫衣也冕冠也黻韋鞞以蔽膝也

珽玉笏也若今吏之持簿音義

衮古本反黻音弗下同珽他頂反鞞音必

笏音忽持簿步古反疏注正義曰畫衣謂畫龍於衣  
徐廣云持簿手版也疏注正義曰畫衣謂畫龍於衣  
玄衣而畫以衮龍衮之言卷也謂龍首卷然玉藻曰  
龍卷以祭知謂龍首卷也尚書益稷云帝曰予欲觀  
古人之象日月星辰山龍華蟲作會宗彝藻火粉米  
黼黻絺繡言觀古人之象謂觀衣服所象日月以至  
黼黻十二物皆衣服之所有也華蟲以上言作會宗  
彝以下言絺繡則二者雖在於服而施之不同冬官

考工記畫繪與繡布采異次知在衣則畫之在裳則刺之故鄭玄禮注及詩箋皆云衣績而裳繡以此知衮是畫文故云衮畫衣也衮衣以下章數鄭玄注司服云有虞氏十二章自日月而下至周而日月星辰畫於旌旗又登龍於山登火於宗彝冕服自九章而下如鄭此言九章者龍一山二華蟲三火四宗彝五在衣藻六粉米七黼八黻九在裳鷩冕者去龍去山自華蟲而下七章華蟲一火二宗彝三在衣餘四章在裳鷩冕者去華蟲去火五章自宗彝而下宗彝一藻二粉米三在衣餘二章在裳希冕者去宗彝去藻三章自粉米而下粉米一在衣餘二章在裳玄冕者其衣無畫裳上刺黻而已杜昭二十五年數九文不取宗彝則與鄭異也冠者首服之大名冕者冠中之別號故云冕冠也世本云黃帝作冕宗仲子云冕冠之有旒者禮文残缺形制難詳周禮弁師掌王之五冕皆玄冕朱裏止言玄朱而已不言所用之物論語

云麻冕禮也蓋以木為幹而用布衣之上玄下朱取  
天地之色其長短廣狹則經傳無文阮謏三禮圖漢  
禮器制度云冕制皆長尺六寸廣八寸天子以下皆  
同沈引董巴輿服志云廣七寸長尺二寸應劭漢官  
儀云廣七寸長八寸沈又云廣八寸長尺六寸者天  
子之冕廣七寸長尺二寸者諸侯之冕廣七寸長八  
寸者大夫之冕但古禮殘缺未知孰是故備載焉司  
馬彪漢書輿服志云孝明帝永平二年初詔有司采  
周官禮記尚書之文制冕皆前圓後方朱裏玄上前  
垂四寸後垂三寸天子白玉珠十二旒三公諸侯青  
玉珠七旒卿大夫黑玉珠五旒皆有前無後此則漢  
法耳古禮鄭玄注弁師云天子衮冕以五采繅前後  
各十二旒旒有五采玉石有二驚冕前後九旒毳冕  
前後七旒希冕前後五旒玄冕前後三旒旒皆五采  
玉十有二上公衮冕三采繅前後九旒旒有三采玉  
九侯伯驚冕三采繅前後七旒旒有三采玉七子男

毳冕三采繅前後五旂旒有二采玉五孤卿以下皆  
二采繅二采玉其旒及玉各依命數耳謂之冕者冕  
俛也以其後高前下有俛俯之形故因名焉蓋以在  
上位者失於驕矜欲令位彌高而志彌下故制此服  
令貴者下賤也黻韞制同而名異鄭玄詩箋云韞大  
古蔽膝之象也冕服謂之韞其他服謂之韞以韞為  
之故云黻韞韞也詩云赤芾在股則芾是當股之衣  
故云以蔽膝也鄭玄易緯乾鑿度注云古者田漁而  
食因衣其皮先知蔽前後知蔽後後王易之以布帛  
而獨存其蔽前者重古道而不忘本也是說黻韞之  
元由也易下繫辭曰包犧氏之王天下也作為網罟  
以佃以漁則田漁而食伏犧時也禮運說上古之時  
云昔者先王食鳥獸之肉衣其羽皮是田漁而食因  
衣其皮也又曰後聖有作治其麻絲以為布帛易繫  
辭曰黃帝堯舜垂衣裳而天下治然則易之布帛自  
黃帝始也垂衣裳服布帛初必始於黃帝其存蔽膝

之象未知始自何代也禮記明堂位云有虞氏服黻  
言舜始作黻也尊祭服而異其名耳未必此時始存  
象也知冕服謂之黻者易云朱紱方來利用享祀知  
他服謂之韠者案士冠禮士服皮弁玄端皆服韠是  
他服謂之韠以冕為主非冕謂之他此欲以兩服相  
形故謂黻為韠韠黻之與韠祭服他服之異名耳其  
體制則同玉藻說玄端服之韠云韠君朱大夫素士  
爵韠發首言韠句末言韠明皆以韠為之凡韠皆象  
裳色言君朱大夫素則尊卑之韠直色別而已無他  
飾也其黻則有文飾焉明堂位曰有虞氏服黻夏后  
氏山殷火周龍章鄭玄云黻冕服之韠也舜始作之  
以尊祭服禹湯至周增以畫文後王彌飾也山取其  
仁可仰也火取其明也龍取其變化也天子備焉諸  
侯火而下卿大夫山士韠韠而已是說黻之飾也玉  
藻曰韠下廣二尺上廣一尺長三尺其頸五寸肩革  
帶博二寸鄭玄云頸五寸亦謂廣也頸中央有兩角

皆上接革帶以繫之肩與革帶廣同是說韠之制也  
記傳更無韠制皆是韠義明其制與韠同經傳作韠  
或作韠或作笄音義同也徐廣車服儀制曰古者韠  
如今蔽膝戰國連兵以韠非兵飾去之漢明帝復制  
韠天子赤皮蔽膝蔽膝古韠也然則漢世蔽膝猶用  
赤皮魏晉以來用絳紗為之是其古今異也以其用  
絲故字或有為紱者天子之笏以玉為之故云珽玉  
笏也管子云天子執玉笏以朝日是有玉笏之文也  
禮之有笏者玉藻云凡有指畫於君前用笏造受命  
於君前則書於笏釋名曰笏忽也君有命則書其上  
備忽忘也或曰簿可以簿疏物也徐廣車服儀制曰  
古者貴賤皆執笏即今手板也然則笏與簿手板之  
異名耳蜀志稱秦密見太守以簿擊頰則漢魏以來  
皆執手板故云若今吏之持簿玉藻云笏畢用也因  
飾焉言貴賤盡皆用笏因飾以示尊卑其上文云笏  
天子以球玉諸侯以象大夫以魚須文竹士竹本象

可也鄭玄云球美玉也文猶飾也大夫士飾竹以為笏不敢與君並用純物是其尊卑異也大夫與士笏俱用竹大夫以魚須飾之士以象骨為飾不敢純用一物所以下人君也用物既殊體制亦異玉藻云天子搢珽方正於天下也諸侯荼前詘後直讓於天子也大夫前詘後詘無所不讓也鄭玄以為謂之珽珽之言珽然無所屈前後皆方正也荼謂舒懦所畏在前也圜殺其首屈於天子也大夫上有天子下有已君故首末皆圜前後皆讓是其形制異也其長則諸侯以下與天子又異珽一名大圭周禮典瑞云王晉大圭以朝日是也冬官考工記大圭長三尺天子服之是天子之珽長三尺也玉藻云笏度二尺有六寸短於天子蓋諸侯

**帶裳幅** 注帶革帶也衣下曰裳

幅若今行膝也 舄複履音義

幅音逼舄音昔膝徒登反複音福

疏

注

義曰下有鞶是紳帶知此帶為革帶玉藻革帶博二寸鄭云凡佩繫於革帶白虎通云男子有鞶革者示有金革之事然則示有革事故用革為帶帶為佩也昭十二年傳云裳下之飾也經傳通例皆上衣下裳故云衣下曰裳幅與行膝今古之異名故云若今行膝詩云邪幅在下毛傳曰幅偃也所以自偃束也鄭箋云邪幅如今行膝也偃束其脛自足至膝膝訓絨也然則行而絨足故名行膝邪纏束之故名邪幅舄者屨之小別鄭玄周禮屨人注云複下曰舄禪下曰屨然則舄之與屨下有禪複為異屨是總名故云舄複屨謂其複下也鄭玄又云天子諸侯吉事皆舄赤舄者冕服之舄白舄者皮弁之舄黑舄者玄端之舄其士皆著屨纁屨者爵弁之屨白屨者皮弁之屨黑屨者玄端之屨其卿大夫服冕者亦赤舄餘服則屨其王后褱衣玄舄褱狄青舄闕狄赤舄鞠衣黃屨展衣白屨褱衣黑屨其諸侯夫人及卿大夫之妻合衣



狄者皆烏其餘皆屨其烏之飾用對方之色赤  
烏黑飾是也屨之飾用比方白屨黑飾是也

衡統

紘統注衡維持冠者統冠之垂者紘纓從下而上者

紘冠上覆音義

統多敢反字林丁坎反紘獲耕反紘  
音延字林弋善反上時掌反下上下

同疏

注正義曰此四物者皆冠之飾也周禮追師掌  
王后之首服追衡笄鄭司農云衡維持冠者鄭

玄云祭服有衡垂於副之兩旁當耳其下以統縣瑱  
彼婦人首服有衡則男子首服亦然冠由此以得支  
立故云維持冠者追者治玉之名王后之衡以玉為  
之故追師掌焉弁師掌王之五冕弁及冕皆用玉笄  
則天子之衡亦用玉其諸侯以下衡之所用則未聞  
純者縣瑱之繩垂於冠之兩旁故云冠之垂者魯語  
敬姜曰王后親織玄統則統必織線為之若今之條  
繩鄭玄詩箋云充耳謂所以縣瑱者或名為統織之

人君五色臣則三色是也條必雜色而魯語獨言玄者以玄是天色故特言之非謂純玄色也紃纓皆以組為之所以結冠於人首也纓用兩組屬之於兩旁結之於頷下垂其餘也紃用一組從下屈而上屬之於兩旁垂其餘也紃纓同類以之相形故云紃纓從下而上者弁師掌王之五冕皆玉笄朱紃祭義稱諸侯冕而青紃士冠禮稱緇布冠青組纓皮弁笄爵弁笄緇組紃鄭玄云有笄者屈組為紃垂為飾無笄者纓而結其條以其有笄者用紃力少故從下而上屬之無笄者用纓力多故從上而下結之冕弁皆有笄故用紃緇布冠無笄故用纓也魯語稱公侯夫人織紃緇知紃亦織而為之士冠禮言組纓組紃知天子諸侯之紃亦用組也緇冠上覆者冕以朱為幹以玄布衣其上謂之緇論語尚書皆云麻冕知其當用布也弁師掌王之五冕皆玄冕知其色用玄也孔安國論語注言績麻三十升布以為冕即是緇也鄭玄玉

藻注云延冕上覆也此云冠上覆者冠冕通名昭其  
故此注衡及綖皆以冠言之其實悉冕飾也

**度也**注尊卑各有制度疏

注正義曰此上十二物者皆是明其制度衰伯思及

則言無次第也鄭玄覲禮注云上公衮無升龍天子  
有升龍有降龍是衮有度也冕則公自衮以下侯伯  
自鷩以下是冕有度也黻則諸侯火以下卿大夫山  
是黻有度也珽則玉象不同長短亦異是珽有度也  
衮冕鷩冕裳四章毳冕希冕裳二章是裳有度也鄭  
玄屨人注云王吉服舄有三等赤舄為上冕服之舄  
下有白舄黑舄王后祭服舄有三等玄舄為上禕衣  
之舄下有青舄赤舄是舄有度也統則人君五色臣  
則三色是統有度也天子朱紘諸侯青紘是紘有度  
也其帶幅衡紼則無以言之傳言昭其度也明其尊  
卑各有制度

**藻率鞞鞞**注藻率以韋為之所以藉玉也王

五采公侯伯三采子男二采鞞佩刀削上飾鞞下飾

**音義**

率音律鞞補頂反鞞布孔反鞞疏注正義曰鄭

鞞刀削之飾鞞在夜反削音笑疏注正義曰鄭  
縹所以藉玉以韋衣木廣袤各如其玉之大小典瑞  
注云縹有五采文所以薦玉木為中榦用韋衣而畫  
之此言以韋為之指木上之韋其實木為榦也禮之  
言縹皆有玉共文大行人謂之縹藉曲禮單稱藉故  
知所以藉玉也大行人云公執桓圭九寸縹藉九寸  
知大小各如其玉也大行人注云縹藉以五采韋衣  
板若奠玉則以藉之是由有奠之時須有縹以之藉  
玉故小大如玉耳典瑞職曰王執鎮圭縹藉五采五  
就以朝日公執桓圭侯執信圭伯執躬圭縹皆三采  
三就子執穀璧男執蒲璧縹皆二采再就以朝覲宗  
遇會同于王是王五采公侯伯三采子男二采也凡  
言五采者皆謂玄黃朱白蒼三采朱白蒼二采朱綠

就成也五就謂五币每一币為一就也禮之言藻其  
文雖多典瑞大行人聘禮覲禮皆單言藻或云縹藉  
未有言縹率者故服虔以藻為畫藻率為刷巾杜以  
藻率為一物者以拭物之巾無名率者服言禮有刷  
巾事無所出且哀伯謂之昭數固應禮之大者寧當  
舉拭物之巾與藻藉為類故知藻率正是藻之複名  
藻得稱為藻藉何以不可名為藻率也玉藻說帶之  
制曰士練帶率下辟凡帶有率無箴功鄭玄云士以  
下皆禪不合而率積如今作幪頭為之也然則禪而  
不合縹絳其邊謂之為率此以韋衣木蓋亦絳積其  
邊故稱率也鄭司農典瑞注讀縹為藻率之藻似亦  
藻率共為藻也詩曰鞞琫容刀故知鞞鞞佩刀削之  
飾也少儀云刀投穎削授柎削是刀之類故與刀連  
言之鞞鞞二名明飾有上下先鞞後鞞故知鞞為上  
飾鞞為下飾劉君以毛詩傳下曰鞞上曰琫而規杜  
氏但鞞鞞或上或下俱是無正文不可以規杜過也

鞶厲游纓注鞶紳帶也一名大帶厲大帶之垂者游

旌旗之游纓在馬膺前如索羈音義

鞶步干反游音留注同膺於陵

反索悉

疏

注正義曰易訟卦上九或錫之鞶帶知鞶即帶也以帶束要垂其餘以為飾謂之紳

上帶為革帶故云鞶紳帶所以別上帶也玉藻說帶

云大夫大帶是一名大帶也詩毛傳云厲帶之垂者

故用毛說以為厲大帶之垂者也大帶之垂者名之

為紳而復名為厲者紳是帶之名厲是垂之貌詩稱

垂帶而厲是厲為垂貌也玉藻稱天子素帶朱裏終

辟諸侯素帶不朱裏大夫素帶辟垂帶皆博四寸士

帶博二寸再繚四寸緇辟下垂賈服等說鞶厲皆與

杜同唯鄭玄獨異禮記內則注以鞶為小囊讀厲如

裂繻之裂言鞶囊必裂繻緣之以為飾案禮記稱男

鞶革女鞶絲鞶是帶之別稱遂以鞶為帶名言其帶

革帶絲耳鞞非囊之號也禮記又云婦事舅姑施繁  
袞袞是囊之別名今人謂裏書之物為袞言其施帶  
施囊耳其繁亦非囊也若以繁為小囊則袞是何器  
若袞亦是囊則不應帶二囊矣以此知鞞即是紳帶  
為得其實游是旒之垂者旒之別名九旗雖各有名  
而旌旗為之總號故云旌旗之游也案巾車王建大  
常十有二旒又大行人云上公九旒侯伯七旒子男  
五旒其孤卿建旌大夫士建物其旒各如其命數其  
鳥旗則七旒熊旗則六旒龜旒則四旒故考工記云  
鳥旗七旒以象鵠火熊旗六旒以象伐龜旒四旒以  
象營室是也鄭司農巾車注云禮家說曰纓當胸以  
削革為之鄭玄云纓今馬鞅是纓在馬膺前也服虔  
云纓如索帟今乘輿大駕有之然則漢魏以來大駕  
之馬膺有索帟是纓之遺象故云如索帟也案巾車  
玉路樊纓十有再就鄭玄注云樊及纓皆以五采屬  
飾之金路樊纓九就象路樊纓七就革路條纓五就

鄭玄云其樊及纓以條絲飾之木路翦樊鵠纓鄭玄云以淺黑飾韋為樊鵠色飾韋為纓不言就數飾與

革路同昭其數也注尊卑各有數疏注正義曰藻有五

率有數也毛詩傳說容刀之飾云天子玉琫而珌珌諸侯盪琫而珌珌是鞞鞞有數也玉藻云紳長制士

三尺有司二尺有五寸又大夫以上帶廣四寸士廣二寸是鞞厲有數也玉路十二旂金路九旂是旂有

數也玉路纓十有二就金路纓九就是纓有數也數之與度大同小異度謂限制數謂多少言其尊卑有

節數也火龍黼黻注火畫火也龍畫龍也白與黑謂之

黼形若斧黑與青謂之黻兩已相戾音義黼音甫戾

疏注正義曰考工記畫績之事云火以圓鄭司農云為圓形似火也鄭玄云形如半環然又曰水以



龍鄭玄云龍水物畫水者并畫龍是衣有畫火畫龍也白與黑謂之黼黑與青謂之黻考工記文也其言形若斧兩已相戾相傳為說孔安國虞書傳亦云黼若斧形黻為兩已相戾是其舊說然也周世袞冕九章傳唯言火龍黼黻四章者畧以明義故文不具舉衣之所畫龍先於火今火先於龍知其言不以次也

昭其文也注以文章明貴賤五色比象昭其物也注

車服器械之有五色皆以比象天地四方以示器物

不虛設音義

比并是反疏注正義曰考工記云畫繪

械戶戒反疏之事雜五色東青南赤西白北黑天玄地黃是其比象天地四方也比象有六而言五者玄在赤黑之間非別色也昭二十五年傳云九文六采言采色有六故注以天地四方六事當之五行之色為五色加天色則為六故五色六采互

相見也昭其物者以示物不虛設必有  
所象其物皆象五色故以五色明之  
錫鸞和鈴昭

其聲也注錫在馬額鸞在鑣和在衡鈴在旂動皆有

鳴聲音義

錫音楊馬面當盧鈴音令額  
疏注正義曰

注云錫馬面當盧刻金為之所謂鏤錫也詩箋云眉  
上曰錫刻金飾之令當盧也然則錫在眉上故云在  
馬額也詩稱輶車鸞鑣知鸞在鑣也鑣在馬口兩旁  
衡在服馬頸上鸞和亦鈴也以處異故異名耳爾雅  
釋天說旌旗有鈴曰旂李巡曰以鈴置旒端是鈴在  
旂也錫在馬額鈴在旂先儒更無異說其鸞和在  
則舊說不同毛詩傳曰在軾曰和在鑣曰鸞韓詩內  
傳曰鸞在衡和在軾前鄭玄經解注取韓詩為說秦  
詩箋云置鸞於鑣異於乘車也其意言乘車之鸞在  
衡田車之鸞在鑣及商頌烈祖之箋又云鸞在鑣是

疑不能定故兩從之也案考工記輪崇車廣衡長參  
如一則衡之所容唯兩服馬耳詩辭每言八鸞當謂  
馬有二鸞鸞若在衡衡唯兩馬安得置八鸞乎以此  
知鸞必在鑣鸞既在鑣則和當在衡經傳不言和數  
未知和有幾也四者皆以金  
為之故動則皆有鳴聲也

### 三辰旂旗昭其明也注

三辰日月星也畫於旂旗象天之明疏

注正義曰春官神仕掌三

辰之法鄭玄亦以為日月星也謂之辰辰時也日以  
照晝月以照夜星則運行於天昏明遞布而正所以  
示民早晚民得取為時節故三者皆為辰也三辰是  
天之光明照臨天下故畫於旂旗象天之明也九旗  
之物唯日月為常不言畫星者蓋大常之上又畫星  
也穆天子傳稱天子葵盛姬建日月七星蓋畫北斗  
七星也案司常交龍為旂熊虎為旗不畫三辰而云  
三辰旂旗者旂旗是九旗之總名可以統大常故舉

以為夫德儉而有度登降有數注登降謂上下尊卑言也

文物以紀之聲明以發之以照臨百官百官於是乎  
戒懼而不敢易紀律今滅德立違注謂立華督違命  
之臣而寘其賂器於大廟以明示百官百官象之其  
又何誅焉國家之敗由官邪也官之失德寵賂章也  
部鼎在廟章孰甚焉武王克商遷九鼎于雒邑注九  
鼎殷所受夏九鼎也武王克商乃營雒邑而後去之  
又遷九鼎焉時但營洛邑未有都城至周公乃卒營

維邑謂之王城即今河南城也故傳曰成王定鼎于

郊鄔音義

寘之豉反置也邪似嗟反維音洛本疏注亦作洛夏戶雅反郊古洽反鄔音辱正

義曰據宣三年傳知九鼎是殷家所受夏九鼎也戰國策稱齊救周求九鼎顏率謂齊王曰昔周伐殷而取九鼎一鼎九萬人挽之九鼎八十一萬人挽之挽鼎人數或是虛言要知其鼎有九故稱九鼎也知武王遷九鼎於洛邑欲以為都者鼎者帝王所重相傳以為寶器戎衣大定之日自可遷置西周乃徙九鼎處于洛邑故知本意欲以為都又以尚書洛誥說周公營洛邑則知武王但有遷意周公乃卒營之地理志云河南縣故郊鄔地也武王遷九鼎焉周公致太平營以為都是為王城至平王居之言即今河南城者晉時猶以為河南縣  
義士猶或非之注蓋伯夷之成王定鼎宣三年傳文

屬疏

注正義曰史記伯夷列傳曰伯夷叔齊孤竹君之二子也讓國俱逃歸周及至西伯卒武王東

伐紂伯夷叔齊叩馬諫曰父死不葬爰及干戈可謂孝乎以臣伐君可謂仁乎左右欲兵之太公曰此義

人也扶而去之武王既平殷夷齊恥之不食周粟隱於首陽山采薇而食之作歌曰登彼西山兮爰采薇矣以暴易暴兮不知其非矣檢書傳之說非武王者唯此人故知是伯夷之屬而况將昭違

亂之賂器於大廟其若之何公不聽周內史聞之曰

臧孫達其有後於魯乎君違不忘諫之以德注內史

周大夫官也僖伯諫隱觀魚其子哀伯諫桓納鼎積

善之家必有餘慶故曰其有後於魯疏

注正義曰周禮春官內史

中大夫是周大夫官也積善之家必有餘慶易文言文也○秋七月杞侯來朝不

敬杞侯歸乃謀伐之○蔡侯鄭伯會于鄧始懼楚也

注楚國今南郡江陵縣北紀南城也楚武王始僭號

稱王欲害中國蔡鄭姬姓近楚故懼而會謀音義近

近之疏注正義曰地理志云南郡江陵縣故楚鄧都楚文王自丹陽徙此世本云楚鬻熊居丹陽

武王徙鄧宋仲子云丹陽在南郡枝江縣今南郡江陵縣北有鄧城史記稱文王徙都于鄧地理志依史

記為說此時當楚武王也譜云楚芊姓顓頊之後也其後有鬻熊事周文王早卒成王封其曾孫熊繹於

楚以子男之田居丹陽今南郡枝江是也熊達始稱武王武王十九年魯隱公之元年也武王居鄧今江

陵是也昭王徙都惠王八年獲麟之歲也惠王二十一年春秋之傳終矣惠王五十七年卒自惠王以下十一世二百九年而秦滅之楚世家稱武王使隨人請王室尊吾號王弗聽還報楚楚王怒乃自立為楚武王是楚武王始僭號稱王也劉炫云號為武武非謚也○九月入杞討不敬也

○公及戎盟于唐修舊好也注惠隱之好音義

好呼報反

注同○冬公至自唐告于廟也凡公行告于宗廟反行

飲至舍爵策勲焉禮也注爵飲酒器也既飲置爵則

書勲勞於策言速紀有功也音義

舍音赦置也舊音捨

疏

正義曰凡

公行者或朝或會或盟或伐皆是也孝子之事親也出必告反必面事死如事生故出必告廟反必面至



不言告禰廟而言告宗廟者諸廟皆告非獨禰也禮記曾子問曰諸侯適天子必告于祖奠于禰命祝史告于宗廟諸侯相見必告于禰命祝史告于五廟反必親告于祖禰乃命祝史告至于前所告者由此而言諸侯朝天子則親告祖禰祝史告餘廟朝鄰國則親告禰祝史告餘廟其路遠者亦親告祖故于其反也言告于祖禰明出時亦告祖也出時不言祖者鄭玄云道近或可以不親告祖明道遠者亦親告祖矣雖親與不親而諸廟皆告故總言告于宗廟也曾子問曰凡告用制幣反亦如之則出入皆以幣告也但出則告而遂行反則告訖又飲至故行言告廟反言飲至以見至有飲而行無飲也飲至者嘉其行至故因在廟中飲酒為樂也襄十三年傳曰公至自晉孟獻子書勞于廟禮也書勞策勲其事一也舍爵乃策勲策勲當在廟知飲至亦在廟也彼公至自晉朝還告廟也此公至自唐盟還告廟也十六年公至自伐

鄭傳曰以飲至之禮伐還告廟也三者傳皆言禮知  
朝會盟伐告廟禮同傳所以反覆凡例也朝還告至  
而獻子書勞則策勲者非唯討伐之勲雖常事有以  
安國寧民或亦書功于廟也公行告至必以嘉會昭  
告祖禰有功則舍爵策勲無功則告事而已無不告  
也反行必告而春秋公行一百七十六書至者唯八  
十二耳其餘不書者釋例曰凡公之行不書至者九  
十有四皆不告廟也隱公之不告謙也餘公之不告  
慢於禮也慢於禮者舉大例言耳其中亦應有心實  
非慢而不宜告者若行有恥辱不足為榮則克躬罪  
已不以告廟非為慢於禮也若事實可恥而不以為  
恥反行告廟則史亦書之宣五年傳曰公如齊高固  
使齊侯止公請叔姬焉夏公至自齊書過也釋例曰  
執止之辱厭尊毀列所以累其先君忝其社稷固當  
克躬罪已不以嘉禮自終宣公如齊既已見止連昏  
於鄰國之臣而行飲至之禮故傳曰書過也是不應

告而告故書之以示過也釋例又曰桓公之喪至自齊此則死還告廟而書至者也莊公違禮如齊觀社用飲至之禮此則失禮之書至者也宣公黑壤之會以賂免諱不書盟而復書至亦諱不以見止告廟也襄公至自晉此則榮還而書至者也昭公至自齊居于郛此則宜告而書至者也諸書至皆告廟啟反或即實而言或有所諱辟傳於伐見飲至之禮於宣見書過之譏於朝見書勞于廟舉此三者以包其他行也僖十六年公會諸侯于淮未歸而取項齊人以爲討而止公十七年秋聲姜以公故會齊侯于下公始得歸而書公至自會是諱其見止而以會告廟故傳曰猶有諸侯之事焉且諱之是諱止而以會告也諸侯盟者必在會後皆書公至自會不言公至自盟者以盟是因會而爲之初必以會徵衆公行以會告廟故還以會告至雖并以盟告亦不云至自盟爲行時不以盟告故也僖二十八年公會諸侯于溫遂圍許

經書公至自圍許襄十年公會諸侯于柵遂滅偃陽  
經書公至自會二文不同釋例曰諸若此類事勢相  
接或以始致或以終致蓋時史之異耳無他義也定  
十二年公至自圍成行不出境而亦告廟者釋例曰  
陪臣執命大都偶國仲由建墮三都之計而成人不  
從故公親伐之雖不越境動衆興兵大其事故出入  
皆告于廟也注正義曰韓詩說一升曰爵爵盡也足  
也二升曰觚觚寡也飲當寡少三升曰解解適也飲  
當自適四升曰角角觸也飲不自適觸罪過也五升  
曰散散訕也飲不自節為人謗訕也總名曰爵其實  
曰觴觴餉也然則飲酒之器其名有五而總稱爲爵  
案燕禮爵用觚解此飲至之爵不過用觚解而已爲  
人君者賞不踰月欲民速覩爲善之利  
故舍爵即書勞於策言連紀有功也

特相會往來

稱地讓事也注特相會公與一國會也會必有主二

人獨會則莫肯為主兩讓會事不成故但書地自參

以上則往稱地來稱會成事也注成會事音義

參七南反

一音三上時掌反

○初晉穆侯之夫人姜氏以條之役生大

子命之曰仇注條晉地大子文侯也意取於戰相仇

怨音義

仇音求

其弟以千畝之戰生命之曰成師注桓

叔也西河界休縣南有地名千畝意取能成其衆疏

正義曰案周本紀宣王三十九年王與姜戎戰于千畝取此戰事以為子名也

師服曰異哉

君之名子也注師服晉大夫音義

名如字或彌政反

夫名以

制義注名之必可言也義以出禮注禮從義出禮以

體政注政以禮成政以正民是以政成而民聽易則

生亂注反易禮義則亂生也疏正義曰出口為名合宜為義人之出言使

合於事宜故云名以制義仗義而行所以生出禮法故云義以出禮履禮而行所以體成政教故云禮以

體政以禮為政以正下民故云政以正民今晉侯名子不得其宜禮教無所從出政不以禮則民各有心

故為始兆亂也嘉耦曰妃怨耦曰仇古之命也注自古有此

言音義耦五口反今君命太子曰仇弟曰成師始兆

亂矣兄其替乎注穆侯愛少子桓叔俱取於戰以為

名所附意異故師服知桓叔之黨必盛於晉以傾宗

國故因名以諷諫音義

替他計反廢也少疏注正義

與桓叔雖並因戰為名而所附意異仇取於戰相仇  
怨成師取能成師衆緣名求義則大子多仇怨而成  
師有徒衆穆侯本立此名未必先生此意但寵愛少  
子於時已著師服知桓叔將盛故推出此理因解其  
名以為諷諫欲使之強幹弱枝耳人臣規諫若無端  
緒馮何致言以申己志非謂人之立名必將有驗而  
何休謂左氏後有興亡由立名善惡

惠之二十四年

引后稷名棄為膏肓以難左氏非也

晉始亂故封桓叔于曲沃注惠魯惠公也晉文侯卒

子昭侯元年危不自安封成師為曲沃伯靖侯之孫

樂賓傳之注靖侯桓叔之高祖父言得貴寵公孫為

傅相音義

靖才井反疏注正義曰案晉世家靖侯生樂力官反

侯穆侯生桓叔靖侯是桓叔之高祖也史傳稱祖皆云祖父故謂高祖為高祖父非高祖之父也特云靖侯之孫則知傳意言其得貴寵公孫為傅相也此人之後遂為樂氏蓋其父字樂

師服曰吾

聞國家之立也本大而末小是以能固故天子建國

注立諸侯也諸侯立家注卿大夫稱家卿置側室注

側室衆子也得立此一官疏

注正義曰禮記文王世子云公若有出疆之政

庶子守公宮正室守大廟鄭玄云正室適子也正室是適子故知側室是衆子言其在適子之旁側也文



十二年傳曰趙有側室曰穿是卿得立此官也卿之家臣其數多矣獨言立此一官者其餘諸官事連於國臨時選用異姓皆得為之其側室一官必用同族是卿庶孫於趙盾為從父昆弟而為盾側室大夫有然選其宗之庶者而為之未必立卿之親弟

貳宗注適子為小宗次子為貳宗以相輔貳音義

丁適

歷反為小宗本疏注正義曰禮有大宗小宗天子諸或作為大宗誤疏注正義曰禮有大宗小宗天子諸為後世之始祖者世適承嗣百世不遷謂之大宗為父後者諸弟宗之五世則遷謂之小宗五世遷者謂高祖以下喪服未絕其繼高祖之適則總服之內共宗之其繼曾祖之適則小功之內共宗之繼祖繼禰所宗及亦然故鄭玄喪服小記注云小宗有四或繼高祖或繼曾祖或繼祖或繼禰皆至五世則遷以總

服既窮不相宗敬故疏即遞遷也禮記大傳曰有百世不遷之宗有五世則遷之宗百世不遷者別子之後也宗其繼別子之所自出者百世不遷者也宗其繼高祖者五世則遷者也是言大宗小宗之別也大夫身是適子為小宗故其次者為貳宗以相輔助為副貳亦立之為此官也杜知非大宗而云小宗者以其大夫不必皆是大宗據為小宗者多故杜言之也若大夫身為大宗亦止得立貳宗官耳禮記據公族為說故言別子為祖主說諸侯庶子耳其實異姓受族亦為始祖其繼者亦是大宗但記文不及之耳沈云適子為小宗謂是大夫之身為小宗次者為貳宗謂大夫庶弟貳宗與側室為例皆是官名與五宗別

士有隸子弟注士卑自以其子弟為僕隸庶人工商

各有分親皆有等衰注庶人無復尊卑以親疏為分

別也衰殺也音義

分扶問反又如字親七刃反又如字衰初危反注同復扶又反別彼

列反殺所界反

是以民服事其上而下無覲覲注下不冀望

上位音義

覲音冀覲羊朱反字林羊住反說文云欲也

今晉甸侯也而建

國本既弱矣其能久乎注諸侯而在甸服者音義

徒甸

練疏

注正義曰周公分大九州廣土萬里制為九服反疏邦畿方千里其外每五百里謂之一服侯甸男

采衛要六服為中國夷鎮藩三服為夷狄大司馬謂之九畿言其有期限也大行人謂之九服言其服事

王也如其數計甸服內畔尚去京師千里晉距王城不容此數而得在甸服者周禮設法耳土地之形不可方平如圖未必每服皆如其數也地理志云初雒邑與宗周通封畿東西長南北短短長相覆為千里

是王畿不正方也志又云東都方六百里半之為三百里外有侯服五百里為八百里計晉都在大原去洛邑近八百里也畿既不方服必差改故晉在甸服也

惠之三十年晉潘父弑

昭侯而納桓叔不克注潘父晉大夫也昭侯文侯子

晉人立孝侯注昭侯子也惠之四十五年曲沃莊伯

伐翼弑孝侯注莊伯桓叔子翼晉國所都翼人立其

弟鄂侯鄂侯生哀侯注鄂侯以隱五年奔隨其年秋

王立哀侯于翼哀侯侵陘庭之田注陘庭翼南鄙邑

音義陘刑陘音庭南鄙啟曲沃伐翼



春秋左傳注疏卷四

春秋左氏傳注疏卷四考證

元年春王正月公即位疏桓之於隱本無君臣之義○

臣照

按或云疏文害理未有甚於此者不可不辨今

按孔穎達言桓之於隱本無君臣之義者未必謂桓本當立以少故諸大夫扳隱而立之桓本是君不得臣於隱也蓋言桓實弑隱桓無君臣之義計必隱死而即改元其心亦靡所恤今歸罪寫氏詐言不與賊謀而用常禮是欲諱其無君孔子如其意而與之而

桓之篡乃彌顯也故下文舉晉悼即位改元于厲公  
被弑時者言之晉厲為欒書等所弑國人迎悼公而  
立之悼公立即改元若果隱公為窩氏所弑與桓無  
與則桓亦當立即改元何為用嗣子之常禮乎以見  
春秋之文隱而顯也若作桓不得以隱為君解豈晉  
悼亦不得以厲為君耶奚為連類及之但其文句頗  
覺難曉如果謂桓不當君隱則大悖也

傳為周公祊故也○臣浩按杜注此條極精孔子於春



秋書假田以示隱諱於詩存魯頌復周公之宇以見大義正為是爾

傳鄭伯拜盟注○

臣召南

按宋儒每攻杜氏曲護傳而

疑經如此注則直言傳之謬誤矣

宋督弑其君與夷及其大夫孔父注孔父稱名者內不能治其閨門外取怨于民身死而禍及其君○臣召

南按孔父忠臣自與仇牧一例春秋書之正以褒忠

臣杜氏橫以為貶而稱名不亦謬乎且孔父名嘉見

於世本杜於上年傳中已注曰孔父嘉孔子六世祖  
矣至此又謂稱名母乃以父為名以嘉為字乎此論  
關係倫常當為駁正孔疏亦阿杜說何也

臣照

按父

并非字古人冠而字則以字稱年五十以上又進而  
尊之則以伯仲叔季稱又進則以父稱此即孔穎達  
之說也

滕子來朝注蓋時王所黜○

臣浩

按滕侯稱子諸說紛

如朱子最取杜說而又疑滕自降黜

公會齊侯陳侯鄭伯于稷以成宋亂注成平也○臣召

南

按經于會盟未有原其事者此特筆見義深惡之

也鄭服解作成就宋亂比杜為長

臣照

按杜氏之意

謂孔子無直斥先君以成人之亂者故釋成為平也  
即以成為平其意自昭

蔡侯鄭伯會于鄧○

臣召南

按隱十年與齊鄭盟鄧注

曰魯地此則蔡鄭之間地也與鄧國俱不同

傳袞冕黻珽疏蜀志稱秦密見太守以簿擊頰○秦密

應作秦宓

傳藻率鞞鞞疏士以下皆禪不合而率積○周禮鄭注  
原文作綖積

傳鞞屬游纓疏玉藻稱天子素帶朱裏終辟諸侯素帶  
不朱裏大夫素帶辟垂○臣浩按此依鄭注約玉藻

之文也玉藻原文曰天子素帶朱裏終辟而素帶終  
辟大夫素帶辟垂鄭注而素帶終辟謂諸侯也記有  
闕文引之不得加耳

傳昭其明也疏昏明遞布而正○遞布應作遞布

傳蔡侯鄭伯會于鄧疏熊達始稱武王○熊達應作熊

通

又疏乃自立為楚武王○史記原文無楚字又趙汭  
補注曰史記伐隨在桓六年則稱王在桓八年也

傳其弟以千畝之戰生疏按周本紀宣王三十九年王  
與姜戎戰于千畝取此戰事以為子名也○臣召南

按史記晉世家及年表穆侯七年伐條生太子仇周

宣王之二十三年也穆侯十年伐千畝有功生少子  
名曰成師宣王之二十六年也與王師敗績于千畝  
事本不同依周本紀宣王三十九年戰于千畝距晉  
穆侯戰千畝時又隔十三年且晉戰而捷故以成師  
名子若王師敗績晉安得言有功乎疏文不據晉世  
家而據周本紀誤牽王室後事為晉國前事謬矣

春秋左氏傳注疏卷四考證

謹案第四頁前四行疏魯親班齊饋刊本監本毛  
本親訛稱據宋本改

前五行不云闕文刊本文訛父今改

第七頁後四行疏不敢自同於正君諸本敢訛可  
據宋本改

第十二頁後二行疏清刊本訛清兩見今並改  
第十三頁前三行注韋韡以穀膝也刊本韡訛從  
早四行音義同今並改

第十五頁後六行疏或曰簿諸本簿訛笏據宋本

改

第十九頁前一行疏皆單言藻諸本藻訛縹據宋

本改



第二十三頁後八行注故曰其有後於魯諸本故

曰訛作減孫據三傳改

第二十五頁後八行疏不以嘉禮自終諸本自訛

同據宋本改





覆校官編修臣張秉愚

校對官修撰臣張書勲

謄錄監生臣徐大豐